


舊唐書

卷一百九十五
之一百九十七

涵芬樓
影印

Centimetres
1 2 3 4 5 6 7 8 9 10 11 12 13 14 15 16 17 18 19
Inches
1 2 3 4 5 6 7 8
TIFFEN® Color Control Patches
© The Tiffen Company, 2007

Blue Cyan Green Yellow Red Magenta White 3/Color Black





舊唐書卷一百九十五


後晉司憲中書門下平章事劉昫 昫撰

劉昫第一一百四十五

題記

題記其先何奴之... 小其俗驍強依此... 居無恒所隨水草... 寇抄為生自突厥... 隋開皇末晉王... 分設大業元年... 昫撰





舊唐書卷一百九十五

後晉司空同中書門下平章事劉 昫撰

列傳第一百四十五

迴紇

迴紇其先匈奴之裔也在後魏時號鐵勒部落其象微小其俗驍強依託高車臣屬突厥近謂之特勒無君長居無恒所隨水草流移人性凶忍善騎射貪婪尤甚以寇抄爲生自突厥有國東西征討皆資其用以制北荒隋開皇末晉王廣北征突厥大破步迦可汗特勒於是分散大業元年突厥處羅可汗擊特勒諸部厚斂其物

又猜忌薛延陀恐爲變遂集其渠帥數百人盡誅之特勒由是叛特勒始有僕骨同羅迴紇拔野古覆羅步號俟斤後稱迴紇焉在薛延陀北境居娑陵水側去長安六千九百里隨逐水草勝兵五萬人口十萬人初有特健俟斤死有子曰菩薩部落以爲賢而立之貞觀初菩薩與薛延陀侵突厥北邊突厥頡利可汗遣子欲谷設率十萬騎討之菩薩領騎五千與戰破之於馬鬣山因逐北至於天山又進擊大破之俘其部衆迴紇由是大振因率其衆附于薛延陀號菩薩爲活頡利發仍遣使朝貢菩薩勁勇有膽氣善籌策每對敵臨陣必身先士

卒以少制衆常以戰陣射獵爲務其母烏羅渾主知爭訟之事平反嚴明部內齊肅迴紇之盛由菩薩之興焉貞觀中擒降突厥頡利等可汗之後北虜唯菩薩薛延陀爲盛太宗冊北突厥莫賀咄爲可汗遣統迴紇僕骨同羅思結阿跌等部迴紇酋帥吐迷度與諸部大破薛延陀多彌可汗遂併其部曲奄有其地貞觀二十年南過賀蘭山臨黃河遣使入貢以破薛延陀功賜宴內殿太宗幸靈武受其降欵因請迴鶻已南置郵遞通管北方太宗爲置六府七州府置都督州置刺史府州皆置長史司馬已下官主之以迴紇部爲瀚海府拜其俟斤

發吐迷度爲懷化大將軍兼瀚海都督時吐迷度已自稱可汗署官號皆如突厥故事以多覽爲燕然府僕骨爲金徽府拔野古爲幽陵府同羅爲龜林府思結爲盧山府渾都部爲臯蘭州斛薩爲高闕州阿跌爲雞田州契苾爲榆溪州跌結爲雞鹿州阿布思爲歸林州白霽爲寘顏州又以迴紇西北結骨爲堅昆府其北骨利幹爲玄闕州東北俱羅勃爲燭龍州於故單于臺置燕然都護府統之以導賓貢貞觀二十二年吐迷度爲其姪烏紇所殺初烏紇蒸其叔母遂與俱陸莫賀達干俱羅勃潛謀殺吐迷度以歸車鼻烏紇俱羅勃並車鼻之婿

也烏紇遂夜領騎十餘劫吐迷度殺之燕然副都護元禮臣遣人給烏紇云將奏而爲都督替吐迷度也烏紇輕騎至禮臣所跪拜致謝禮臣擒而斬之以聞太宗恐迴紇部落携離十月遣兵部尚書崔敦禮往安撫之仍以敦禮爲金山道副將軍贈吐迷度左衛大將軍賻物及衣服設祭甚厚以吐迷度子前左屯衛大將軍翊左郎將婆閏爲左驍衛大將軍大俟利發使持節迴紇部落諸軍事瀚海都督後俱羅勃來朝太宗留之不遣詔西突厥可汗阿史那賀魯統五噉五俟斤二十餘部居多羅斯水南去西州馬行十五日程迴紇不肯西屬突

厥永徽二年賀魯破北庭詔將軍梁建方契苾何力領兵二萬取廻紇五萬騎大破賀魯收復北庭顯慶元年賀魯又犯邊詔程知節蘇定方任雅相蕭嗣業領兵并廻紇大破賀魯於陰山再破於金牙山盡收所據之地西逐至耶羅川賀魯西奔石國婆閩隨蘇定方逐賀魯至石國西北蘇咄城城主伊涅達干執賀魯送洛陽以其地置濛池崑陵府以阿史那彌射阿史那步真爲二府都督統十姓左廂五弩失畢右廂五咄陸以賀魯種落分置州縣西盡波斯加婆閩右衛大將軍兼瀚海都督永徽六年廻鶻遣兵隨蕭嗣業討高麗龍朔中婆閩

死妹比粟毒主領廻鶻與同羅僕固犯邊高宗命鄭仁泰討平僕固等比粟毒敗走因以鐵勒本部爲天山縣永隆中獨解支嗣聖中伏帝匄開元中承宗伏帝難並繼爲酋長皆受都督號以統蕃州左殺右殺分管諸部開元中廻鶻漸盛殺涼州都督王君奐斷安西諸國入長安路玄宗命郭知運等討逐退保烏德健山南去西城一千七百里西城卽漢之高闕塞也西城北去磧石口三百里有十一都督本九姓部落一曰藥羅葛卽可汗之姓二曰胡咄葛三曰咄羅勿四曰貊歌息訖五曰阿勿啗六曰葛薩七曰斛唃素八曰藥勿葛九曰奚耶

勿每一部落一都督破拔息密收一部落破葛邏祿收一部落各置都督一人統號十一部落每行止鬪戰常以二客部落爲軍鋒天寶初其酋長葉護頡利吐發遣使入朝封奉義王三載擊破拔悉密自稱骨咄祿毘伽闕可汗又遣使入朝因冊爲懷仁可汗及至德元載七月肅宗於靈武卽位遣故邠王男承寀封爲燉煌王將軍石定番使于廻紇以修好徵兵及至其牙可汗以女嫁於承寀遣首領來朝請和親封廻紇公主爲毘伽公主肅宗在彭原遇之甚厚二載二月廻紇又使首領大將軍多攬等十五人入朝九月戊寅加承寀開府儀同

三司拜宗正卿納廻紇公主爲妃廻紇遣其太子葉護領其將帝德等兵馬四千餘衆助國討逆肅宗宴賜甚厚又命元帥廣平王見葉護約爲兄弟接之頗有恩義葉護大喜謂王爲兄戊子廻紇大首領達干等一十三人先至扶風與朔方將士見僕射郭子儀留之宴設三日葉護太子曰國家有難遠來相助何暇食爲子儀固留之宴畢便發其軍每日給羊二百口牛二十頭米四十碩及元帥廣平王率郭子儀等至香積寺東二十里西臨灃水賊埋精騎於大營東將襲我軍之背朔方左廂兵馬使僕固懷恩指廻紇馳救之匹馬不歸因收西

京十月廣平王副元帥郭子儀領廻紇兵馬與賊戰於陝西初次于曲沃葉護使其將軍車鼻施吐撥裴羅等旁南山而東遇賊伏兵于谷中盡殪之子儀至新店遇賊戰軍却數里廻紇望見踰山西嶺上曳白旗而趨擊之直出其後賊衆大敗軍而北坑逐北二十餘里人馬相枕藉蹂踐而死者不可勝數斬首十餘萬伏屍三十里賊黨嚴莊馳告安慶緒率其黨背東京北走渡河而葉護從廣平王僕射郭子儀入東京初收西京廻紇欲入城劫掠廣平王固止之及收東京廻紇遂入府庫收財帛於市井村坊剽掠三日而止財物不可勝計廣平

王又賚之以錦罽寶貝葉護大喜及肅宗還西京十一月癸酉葉護自東京至勅百官於長樂驛迎上御宣政殿宴勞之葉護升殿其餘酋長列於階下賜錦繡繒綵金銀器皿及辭歸蕃上謂曰能爲國家就大事成義勇者卿等力也葉護奏曰廻紇戰兵留在沙苑今且須歸靈夏取馬更收范陽討除殘賊已丑詔曰功濟艱難義存邦國萬里絕域一德同心求之古今所未聞也廻紇葉護特稟英姿挺生奇畧言必忠信行表溫良才爲萬人之敵位列諸蕃之長屬凶醜亂常中原未靖以可汗有兄弟之約與國家興父子之軍奮其智謀討彼克逆

一鼓作氣萬里摧鋒二旬之間兩京克定力拔山岳精
貫風雲蒙犯不以辭其勞急難無以踰其分固可懸之
日月傳之子孫豈惟裂土之封誓河之賞而已矣夫位
之崇者司空第一名之大者封王最高可司空仍封忠
義王每載送絹二萬匹至朔方軍宜差使受領乾元元
年五月壬申朔廻紇使多亥阿波八十人黑衣大食酋
長閣之等六人竝朝見至閣門爭長通事舍人乃分爲
左右從東西門竝入六月戊戌宴廻紇使於紫宸殿前
秋七月丁亥詔以幼女封爲寧國公主出降其降蕃日
仍以堂弟漢中郡王瑀爲特進試太常卿攝御史大夫

克冊命英武威遠毘伽可汗使以堂姪左司郎中巽爲
兵部郎中攝御史中丞鴻臚卿副之兼克寧國公主禮
會使特差重臣開府儀同三司行尚書右僕射冀國公
裴冕送至界首癸巳以冊立廻紇英武威遠毘伽可汗
上御宣政殿漢中王瑀受冊命甲午肅宗送寧國公主
至咸陽磁門驛公主泣而言曰國家事重死且無恨上
流涕而還及瑀至其牙帳毘伽闕可汗衣赭黃袍胡帽
坐於帳中榻上儀衛甚盛引瑀立於帳外謂瑀曰王是
天可汗何親瑀曰是唐天子堂弟又問於王上立者爲
誰瑀曰中使雷盧俊可汗又報曰中使是奴何得向郎

君上立雷盧俊竦懼跳身向下立定瑀不拜而立可汗
報曰兩國主君臣有禮何得不拜瑀曰唐天子以可汗
有功故將女嫁與可汗結姻好比者中國與外蕃親皆
宗室子女名爲公主今寧國公主天子真女又有才貌
萬里嫁與可汗可汗是唐家天子女婿合有禮數豈得
坐於榻上受詔命耶可汗乃起奉詔便受冊命翼日冊
公主爲可敦蕃酋歡欣曰唐國天子貴重將真女來瑀
所送國信繒綵衣服金銀器皿可汗盡分與衙官酋長
等及瑀回可汗獻馬五百匹貂裘白氈八月廻紇使王
子骨斲特勒及宰相帝德等驍將三千人助國討逆肅

宗嘉其遠至賜宴命隨朔方行營使僕固懷恩押之九
月甲申廻紇使大首領蓋將等謝公主下降兼奏破堅
昆五萬人宴於紫宸殿賜物有差十二月甲午廻紇使
三婦人謝寧國公主之聘也賜宴紫宸殿乾元二年廻
紇骨斲特勒等率衆從郭子儀與九節度於相州城下
戰不利三月壬子廻紇王子骨斲特勒及宰相帝德等
十五人自相州奔于西京肅宗宴之于紫宸殿賞物有
差其月庚寅廻紇特勒辭還行營上宴之于紫宸殿賜
物有差乙未以廻紇王子新除左羽林軍大將軍員外
置骨斲特勒爲銀青光祿大夫鴻臚卿員外置夏四月

廻紇毘伽闕可汗死長子葉護先被殺乃立其少子登里可汗其妻爲可敦六月丙午以左金吾衛將軍李通爲試鴻臚卿攝御史中丞充弔祭廻紇使毘伽闕可汗初死其牙官都督等欲以寧國公主殉葬公主曰我中國法壻死卽持喪朝夕哭臨三年行服今廻紇娶婦須慕中國禮若今依本國法何須萬里結婚然公主亦依廻紇法務面大哭竟以無子得歸秋八月寧國公主自廻紇還詔百官於明鳳門外迎之上元元年九月己丑廻紇九姓可汗使大臣俱陸莫達干等入朝奉表起居乙卯廻紇使二十人於延英殿通謁賜物有差十一月

戊辰廻紇使延支伽羅等十人於延英殿謁見賜物有差寶應元年代宗初卽位以史朝義尚在河洛遣中使劉清潭徵兵於廻紇又修舊好其秋清潭入廻紇庭廻紇已爲史朝義所誘云唐家天子頗有大喪國亂無主請發兵來收府庫可汗乃領衆而南已八月矣清潭賫勅書國信至可汗曰我聞唐家已無主何爲更有勅書中使對曰我唐家天子雖棄萬國嗣天子廣平王天生英武往年與廻紇葉護兵馬同收兩京破安慶緒與可汗有故又每年與可汗緡絹數萬匹可汗豈忘之耶然廻紇業已發至三城北見荒城無戍卒州縣盡爲空壘

有輕唐色乃遣使北收單于兵馬倉糧又大辱清潭清潭發使來奏云迴紇登里可汗傾國自來有衆十萬羊馬不知其數京師大駭上使殿中監藥子昂馳勞之及於太原北忻州南子昂密數其丁壯得四千人老小婦人相兼萬餘人戰馬四萬匹牛羊不紀先是毘伽闕可汗請以子婚肅宗以僕固懷恩女嫁之及是爲可敦與可汗同來請懷恩及懷恩母相見上勅懷恩自汾州見之於太原懷恩又謙國家恩信不可違背初欲自蒲關入取沙苑路由潼關東向破賊子昂說之云國家頻遭寇逆州縣虛乏難爲供擬恐可汗失望不如取土門路

入直取邢洛衛懷賊中兵馬盡在東京可汗收其財帛束裝南向最爲上策可汗不從又說取懷州太行路南據河陰之險直扼賊之喉亦上策也可汗又不從又說取陝州太陽津路食太原倉粟而東與澤潞河南懷鄭節度同入亦上策也可汗從之子昂因入奏上以雍王适爲兵馬元帥加懷恩同中書門下平章事又以子昂兼御史中丞與前潞府兼御史中丞魏琚爲左右廂兵馬使以中書舍人韋少華充元帥判官兼掌書記給事中李進兼御史中丞充元帥行軍司馬東會迴紇登里可汗營於陝州黃河北元帥雍王領子昂等從而見之

可汗責雍王不於帳前舞蹈禮倨子昂辭以元帥是嫡孫兩宮在殯不合有舞蹈迴紇宰相及車鼻將軍庭詰曰唐天子與登里可汗約爲兄弟今可汗卽雍王叔叔姪有禮數何得不舞蹈子昂苦辭以身有喪禮不合又報云元帥卽唐太子也太子卽儲君也豈有中國儲君向外國可汗前舞蹈相拒久之車鼻遂引子昂李進少華魏琚各榜捶一百少華琚因榜捶一宿而死以王少年未諳事放歸本營而懷恩與迴紇右殺爲先鋒及諸節度同攻賊破之史朝義率殘寇而走元帥雍王退歸靈寶迴紇可汗繼進於河陽列營而止數月去營百餘

里人被剽劫逼辱不勝其弊懷恩常爲軍殿及諸節度收河北州縣僕固瑒與迴紇之衆追躡二千餘里至平州石城縣梟朝義首而歸河北悉平懷恩自相州西出崞口路而西可汗自河陽北出澤潞與懷恩會歷太原遣使拔賀那上表賀收東京并進逆賊史朝義旌旗等物辭還蕃代宗引見於內殿賜綵二百段初迴紇至東京以賊平恣行殘忍士女懼之皆登聖善寺及白馬寺二閣以避之迴紇縱火焚二閣傷死者萬計累旬火焰不止及是朝賀又縱橫大辱官吏以陝州節度使郭英父權知東都留守時東郡再經賊亂朔方軍及郭英父

魚朝恩等軍不能禁暴與廻紇縱掠坊市及汝鄭等州
比屋蕩盡人悉以紙爲衣或有衣經者代宗御宣政殿
出冊文加冊可汗爲登里頡咄登密施舍俱錄英義建
功毘伽可汗可敦加冊爲婆墨光親麗華毘伽可敦頡
咄華言社稷法用登密施華言封竟含俱錄華言婁羅
毘伽華言足意智婆墨華言得憐以散騎常侍兼御史
大夫王翊充使就可汗行營行冊命焉可汗可敦及左
右殺諸都督內外宰相已下共加實封二千戶令王翊
就牙帳前禮冊左殺封爲雄朔王右殺封爲寧朔王胡
祿都督封金河王拔覽將軍封爲靜漠王諸都督一十

一人竝封國公尋而懷恩叛投靈武有朔方舊將任敷
張韶等收合餘燼衆至數萬廣德二年秋乃引吐蕃之
衆數萬人至奉天縣朔方節度郭子儀率衆拒之而退
永泰元年秋懷恩遣兵馬使范至誠任敷將兵又誘廻
紇吐蕃吐谷渾党項奴刺之衆二十餘萬以犯奉天醴
泉鳳翔同州等處被其逆命先以郭子儀屯涇陽渾日
進屯奉天數摧其鋒又聞懷恩死吐蕃將馬重英等十
月初引退取邠州舊路而歸廻紇首領羅達干等率其
衆二千餘騎詣涇陽請降子儀許之率衆被甲持滿數
千人廻紇譯曰此來非惡心要見令公子儀曰我令公

也迴紇曰請去甲子儀便脫兜鍪槍甲策馬挺身而前迴紇酋長相顧曰是也時太子太保李光進兼御史大夫路嗣恭戎裝介馬在子儀之側子儀指視迴紇曰此是渭北節度李太保又曰此是朔方軍糧使路大夫迴紇便下馬羅拜子儀亦下馬迴紇之衆爲左右翼各數百人漸進子儀麾下亦馳而至于子儀麾退之子儀命酒與之飲贈之纏頭綵三千匹子儀執迴紇大將可汗弟合胡祿都督藥羅葛等手責讓之曰我國家知汝迴紇有功報汝大厚汝何背約負信犯我王畿我須與汝戰何乃降爲我一身挺入汝營任汝拘繫我麾下將士須

與汝戰迴紇又譯曰懷恩負心來報可汗云唐國天子今已向江淮令公亦不主兵我是以敢來今知天可汗見在上郭令公爲將懷恩天又殺之今請追殺吐蕃收其羊馬以報國恩然懷恩子可敦兄弟請勿殺之合胡祿都督等與宰相磨咄莫賀達干宰相噉莫賀達干宰相護都毘伽將軍宰相揭拉裴羅達干宰相梅錄大將軍羅達干平章事海盈闕達干等子儀先執杯合胡祿都督請咒子儀咒曰大唐天子萬萬歲迴紇可汗亦萬歲兩國將相亦萬歲若起負心違背盟約者身死陣前家口屠戮合胡祿都督等失色及杯至卽譯曰如令公

盟約皆喜曰初發本部來日將巫師兩人來云此行大安穩然不與唐家兵馬鬪見一大人卽歸今日領兵見令公公不爲疑脫去衣甲單騎相見誰有此心膽是不戰鬪見一大人巫師有徵矣歡躍久之子儀撫其背首領等分纏頭練以賞巫師請諸將同擊吐蕃子儀如其約翌日使領廻紇首領開府古野那等六人入京朝見又五日朔方先鋒兵馬使開府南陽郡王白元光與廻紇兵馬合於涇州靈臺縣西五十里赤山嶺共破吐蕃等十餘萬衆斬首五萬餘級生擒一萬餘人駝馬牛羊凡百里相繼不可勝紀收得蕃落五千餘人初白元

光等到靈臺縣西探知賊勢爲月明思少陰晦廻紇使巫師便致風雪及遲明戰吐蕃盡寒凍弓矢皆廢披氊徐進元光與廻紇隨而殺之蔽野僕固各臣懷恩之姪尤爲驍將亦領千餘騎來降尋而子儀又使廻紇宰相護地毘伽將軍宰相梅錄大將軍開府儀同三司試太常卿羅達干等一百九十六人來見上賜宴於延英殿錫賚甚厚閏月子儀自涇陽領僕固各臣入奏廻紇進馬及宴別前後賚繒練十萬匹而還時帑藏空虛朝官無祿俸隨月給手力謂之資課錢稅朝官閏十月十一月十二月課以供之大曆六年正月廻紇於鴻臚寺擅

出坊市掠人子女所在官奪返毆怒以三百騎犯金光門朱雀門是日皇城諸門盡閉上使中使劉清潭宣慰乃止七年七月廻紇出鴻臚寺入坊市強暴逐長安令邵說於含光門之街奪說所乘馬將去說脫身避走有司不能禁八年十一月廻紇一百四十人還蕃以信物一千餘乘廻紇恃功自乾元之後屢遣使以馬和市繒帛仍歲來市以馬一匹易絹四十匹動至數萬馬其使候遣繼留於鴻臚寺者非一蕃得帛無厭我得馬無用朝廷甚苦之是時特詔厚賜遣之示以廣恩且俾知愧也是月廻紇使使赤心領馬一萬匹來求市代宗以馬

價出於租賦不欲重困於民命有司量入計許市六千匹十年九月廻紇白晝刺人於東市市人執之拘於萬年縣其首領赤心聞之自鴻臚寺馳入縣獄劫囚而出斫傷獄吏十三年正月廻紇寇太原過榆次太谷河東節度留後太原尹兼御史大夫鮑防與廻紇戰于陽曲我師敗績死者千餘人代州都督張光晟與廻紇戰于羊武谷破之廻紇引退先是辛雲京守太原廻紇懼雲京不敢窺并代知鮑防無武畧乃敢凌逼賴光晟邀戰勝之北人乃安德宗初卽位使中官梁文秀告哀於廻紇且修舊好可汗移地健不爲禮而九姓胡素屬於廻

紀者又陳中國便利以誘其心可汗乃舉國南下將乘我喪其宰相頓莫賀達干諫曰唐大國也且無負於我前年入太原獲羊馬數萬計可謂大捷矣以道途艱阻比及國傷耗殆盡今若舉而不捷將安歸乎可汗不聽頓莫賀乘人之心因擊殺之并殺其親信及九姓胡所誘來者凡二千人頓莫賀自立號爲合骨咄祿毘伽可汗使其酋長建達干隨文秀來朝命京兆尹源休持節冊爲武義成功可汗貞元三年八月迴紇可汗遣首領墨噶達干多覽將軍合闕達干等來貢方物且請和親四年十月迴紇公主及使至自蕃德宗御延喜門見之

時迴紇可汗喜於和親其禮甚恭上言昔爲兄弟今爲子婿半子也又詈辱吐蕃使者及使大首領等妻妾凡五十六婦人來迎可敦凡遣人千餘納聘馬二千德宗令朔州太原分留七百人其宰相首領皆至分館鴻臚將作癸巳見於宣政殿乙未德宗召迴紇公主出使者對於麟德殿各有頒錫庚子詔咸安公主降迴紇可汗仍置府官屬視親王例以殿中監嗣滕王湛然爲咸安公主婚禮使關播檢校右僕射送咸安公主及冊迴紇可汗使貞元五年十二月迴紇汨咄祿長壽天親毘伽可汗薨廢朝三日文武三品已上就鴻臚寺弔其來使

貞元六年六月迴紇使移職伽達干歸蕃賜馬價絹三十萬匹以鴻臚卿郭鋒兼御史大夫充冊迴紇忠貞可汗使是歲四月忠貞可汗爲其弟所殺而篡立時迴紇大將頡于伽斯西擊吐蕃未回其次相率國人縱殺篡者而立忠貞之子爲可汗年方十六七及六月頡于伽斯西討回將至牙帳次相等懼其後有廢立不欲漢使知之留鋒數月而回頡于伽斯之至也可汗等出迎郊野陳郭鋒所送國信器幣可汗與次將相等皆俯伏自說廢立之由且請命曰惟大相生死之悉以所陳器幣贈頡于伽斯以悅之可汗又拜泣曰兒愚幼無知今幸

得立惟仰食於阿爹可汗以子事之頡于伽斯以卑遜興感乃相持號哭遂執臣子之禮焉盡以所陳器幣頒賜左右諸從行將士已無所取自是其國稍安乃遣達比特勒梅錄將軍告忠貞可汗之哀于我且請冊新君使至廢朝三日仍令三品已上官就鴻臚寺弔其使是歲吐蕃陷北庭都護府初北庭安西旣假道於迴紇以朝奏因附庸焉迴紇徵求無厭北庭差近凡生事之資必強取之又有沙陀部落六千餘帳與北庭相依亦屬於迴紇肆行抄奪尤所厭苦其先葛祿部落及白服突厥素與迴紇通和亦憾其侵掠因吐蕃厚賂見誘遂附

之於是吐蕃率葛祿白服之衆去冬寇北庭迴紇大相
頡干伽斯率衆援之頻敗吐蕃急攻之北庭之人旣苦
迴紇乃舉城降焉沙陀部落亦降節度使檢校工部尚
書楊襲古將麾下二千餘衆出奔西州頡干利亦還十
年秋悉其國丁壯五萬人召襲古將復焉俄爲所敗死
者大半頡干利收合餘燼晨夜奔還襲古餘衆僅百六
十將復入西州頡干伽斯給之曰第與我同至牙帳當
送君歸本朝旣及牙帳留而不遣竟殺之自是安西阻
絕莫知存亡唯西州之人猶固守焉頡干伽斯敗葛祿
乘勝取迴紇之浮圖川迴紇震恐悉遷西北部落羊馬

於牙帳之南以避之貞元七年五月庚申朔以鴻臚少
卿庾鈺兼御史大夫冊迴紇可汗及弔祭使是月迴紇
遣使律支達干等來朝告小寧國公主薨廢朝三日故
肅宗以寧國公主降迴紇又以榮王女媵之及寧國來
歸榮王女爲可敦迴紇號爲小寧國公主歷配英武英
義二可汗及天親可汗立出居於外生英武二子爲天
親可汗所殺無幾薨七年八月迴紇遣使獻敗吐蕃葛
祿於北庭所捷及其俘畜先是吐蕃入靈州爲迴紇所
敗夜以火攻駭而退十二月迴紇遣殺支將軍獻吐蕃
俘大首領結心德宗御延喜門觀之八年七月以迴紇

藥羅葛靈檢校右僕射靈本唐人姓呂氏因入迴紇爲可汗養子遂以可汗姓爲藥羅葛靈在國用事因來朝寵賚甚厚仍給市馬絹七萬匹九年九月遣使來朝貢貞元十一年六月庚寅冊拜迴紇騰里邏羽錄沒密施合祿胡毘懷信可汗元和四年藹德曷里祿沒弭施合密毘迦可汗遣使改爲迴鶻義取迴旋輕捷如鶻也八年四月迴鶻請和親使伊難珠還蕃宴于三殿賜以銀器繒帛是歲迴鶻數千騎至鶻鵝泉邊軍戒嚴十二月二日宴歸國迴鶻摩尼八人令至中書見宰臣先是迴鶻請和親憲宗使有司計之禮費約五百萬貫方內有

誅討未任其親以摩尼爲迴鶻信奉故使宰臣言其不可乃詔宗正少卿李孝誠使于迴鶻太常博士殷侗副之諭其來請之意長慶元年毘伽保義可汗薨輟朝三日仍令諸司三品已上官就鴻臚寺弔其使者四月正衙冊迴鶻君長爲登羅羽錄沒密施句主錄毘伽可汗以少府監裴通爲檢校左散騎常侍兼御史大夫持節冊立兼弔祭使五月迴鶻宰相都督公主摩尼等五百七十三人入朝迎公主於鴻臚寺安置勅太和公主出降迴鶻爲可敦宜令中書舍人王起赴鴻臚寺宣示以左金吾衛大將軍胡証檢校戶部尚書持節充送公主

入迴鶻及冊可汗使光祿卿李憲加兼御史中丞充副使太常博士殷侑改殿中侍御史充判官吐蕃犯青塞堡以迴紇和親故也鹽州刺史李文悅發兵擊退之迴鶻奏以一萬騎出北庭一萬騎出安西拓吐蕃以迎太和公主歸國其月勅太和公主出降迴紇宜特置府其官屬宜視親王例迴鶻自咸安公主歿後屢歸款請繼前好久未之許至元和末其請彌切憲宗以北虜有勲勞於王室又西戎比歲爲邊患遂許以妻之旣許而憲宗崩穆宗卽位踰年乃封第十妹爲太和公主將出降迴紇登邏骨沒密施合毘伽可汗遣使伊難珠句錄都

督思結并外宰相駙馬梅錄司馬兼公主一人葉護公主一人及達干并駝馬千餘來迎太和公主發赴迴紇國穆宗御通化門左个臨送使百寮章敬寺前立班儀衛甚盛士女傾城觀焉十一月振武節度張惟清奏準詔發兵三千赴蔚州數內已發一千人訖餘二千人待太和公主出界卽發遣又奏天德轉牒云迴鶻七百六十人將駝馬及車相次至黃蘆泉迎候公主豐州刺史李祐奏迎太和公主迴鶻三千於卿泉下營拓吐蕃二年二月賜迴紇馬價絹五萬匹三月又賜馬價絹七萬匹是月裴度招討幽鎮之亂迴鶻請以兵從度討伐朝

議以寶應初迴紇收復兩京恃功驕恣難制咸以爲不可遂命中使止迴紇令歸會其已上豐州北界不從上詔發繒帛七萬匹賜之方還五月命使冊立登囉骨沒密施合毘伽禮可汗遣品官田務豐領國信十二車使迴鶻賜可汗及太和公主長慶二年閏十月金吾大將軍胡証副使光祿卿李憲婚禮使衛尉卿李銳副使宗正少卿李子鴻判官虞部郎中張敏太常博士殷侗送太和公主至自迴紇皆云初公主去迴紇牙帳尚可信宿可汗遣數百騎來請與公主先從他道去胡証曰不可虜使曰前咸安公主來時去花門數百里卽先去今

何獨拒我証曰我天子詔送公主以投可汗今未見可汗豈宜先往虜使乃止旣至虜庭乃擇吉日冊公主爲迴鶻可敦可汗先升樓東向坐設氊幄於樓下以居公主使羣胡主教公主以胡法公主始解唐服而衣胡服以一嫗侍出樓前西向拜可汗坐而視公主再俯拜訖復入氊幄中解前所服而披可敦服通裾大襦皆茜色金飾冠如角前指後出樓俯拜可汗如初禮虜先設大輿曲辰前設小座相者引公主升輿迴紇九姓相分負其輿隨日右轉於庭者九公主乃降輿升樓與可汗俱東向坐自此臣下朝謁并拜可敦可敦自有牙帳命二

相出入帳中証等將歸可敦宴之帳中留連號啼者竟日可汗因贈漢使以厚貺大和元年命中使以絹二十萬匹付鴻臚寺宣賜迴鶻充馬價三年正月中使以絹二十三萬匹賜迴紇充馬價七年三月迴紇李義節等將駝馬到且報可汗三月二十七日薨已冊親弟薩特勒廢朝三日仍令諸司文武三品尚書省四品已上官就鴻臚寺弔其使者以左驍衛將軍皇城留守唐弘實爲金吾將軍兼御史大夫持節充入迴鶻弔祭冊立使九年六月入朝迴鶻進太和公主所獻馬射女子七人沙陀小兒二人開成初其相有安允合者與特勒柴草

欲慕薩特勒可汗薩特勒可汗覺殺柴草及安允合又有迴紇相掘羅勿者擁兵在外怨誅柴草安允合又殺薩特勒可汗以廬馭特勒爲可汗有將軍句錄末賀恨掘羅勿走引黠戛斯領十萬騎破迴鶻城殺廬馭斬掘羅勿燒蕩殆盡迴鶻散奔諸蕃有迴鶻相馭職者擁外甥龐特勒及男鹿并遏粉等兄弟五人一十五部西奔葛邏祿一支投吐蕃一支投安西又有近可汗牙十三部以特勒烏介爲可汗南來附漢初黠戛斯破迴鶻得太和公主黠戛斯自稱李陵之後與國同姓遂合達干十人送公主至塞上烏介途遇黠戛斯使達干等並被

殺太和公主却歸烏介可汗乃質公主同行南渡大磧至天德界奏請天德城與太和公主居有迴鶻相赤心者與連位相姓僕固者與特勒那頡斡擁部衆不賓烏介赤心欲犯塞烏介遣其屬盟沒斯先布誠於天德軍使田牟然後誘赤心宰相同謁烏介可汗戮赤心於可汗帳下并僕固二人那頡戰勝全占赤心下七千帳東瞰振武大同據室韋黑沙榆林東南入幽州雄武軍西北界幽州節度使張仲武遣弟仲至率兵大破那頡之衆全收七千帳殺戮收擒老小近九萬人那頡中箭透颰羣潛脫烏介獲而殺之烏介諸部猶稱十萬衆駐牙

大同軍北閭門山時會昌二年秋頻劫東陝已北天德振武雲朔比雁俘戮詔諸道兵悉至防捍以河東節度使劉沔充南面招控迴鶻使以幽州節度使張仲武充東面招控迴鶻使二年冬三月春迴鶻特勒麗俱遮阿敦寧二部迴鶻公主密羯可敦一部外相諸洛固阿跌一部及牙帳大將曹磨你等七部共三萬衆相次降於幽州詔配諸道有特勒盟沒斯阿歷支習勿斡三部迴鶻相愛耶勿弘順迴鶻尚書呂衡等諸部降振武三部首領皆賜姓李氏及名思忠思貞思惠思恩充歸義使有特勒葉被沽兄李二部南奔吐蕃有特勒可質力二

部東北奔大室韋有特勒荷勿斲東討契丹戰死會昌三年迴鶻尚書僕固繹到幽州約以太和公主歸幽州烏介去幽州界八十里下營其親信骨肉及摩尼志淨等四人已先入振武軍是夜河東劉沔率兵奄至烏介營烏介驚走東北約四百里外依和解室韋下營不及將太和公主同走豐州刺史石雄兵遇太和公主帳因迎歸國烏介部衆至大中元年詣幽州降留者漂流餓凍衆十萬所存止三千已下烏介嫁妹與室韋託附之爲迴鶻相美權者逸隱啜逼諸迴鶻殺烏介於金山以其弟特勒遏捻爲可汗復有衆五千已上其食用糧羊

皆取給於奚王碩舍朗大中元年春張仲武大破奚衆其迴鶻無所取給日有耗散至二年春唯存名王貴臣五百人已下依室韋張仲武因賀正室韋經過幽州仲武却令還蕃遣送遏捻等來向幽州遏捻等懼是夜與妻葛祿子特勒毒斯等九騎西走餘衆奔之不及迴鶻諸相達官老幼大哭室韋分迴鶻餘衆爲七分七姓室韋各占一分經三宿黠戛斯相阿播領諸蕃兵稱七萬從西南天德北界來取遏捻及諸迴鶻大敗室韋迴鶻在室韋者阿播皆收歸磧北在外猶數帳散藏諸山深林盜劫諸蕃皆西向傾心望安西龐勒之到龐勒已自

稱可汗有積西諸城其後嗣君弱臣強居甘州無復昔時之盛到今時遣使入朝進玉馬二物及本土所產交易而返

史臣曰自三代已前兩漢之後西羌北狄互興部族其名不同爲患一也蔡邕云邊陲之患爲手足之疥中國之困爲胸背之疽突厥爲煬帝之患深矣隋竟滅中國之困其理昭然自太宗平突厥破延隋而迴紇興焉太宗幸靈武以降之置州府以安之以名爵玉帛以恩之其義何哉蓋以狄不可盡而以威惠羈縻之開元中三綱正百姓足四夷八蠻翕然向化要荒之外畏威懷惠

不其盛矣天寶末奸臣弄權於內逆臣跋扈於外內外結釁而車駕遽遷華夷生心而神器將墜肅宗誘迴紇以復京畿代宗誘迴紇以平河朔戡難中興之功大卽大矣然生靈之膏血已乾不能供其求取朝廷之法令竝弛無以抑其憑陵忍耻和親姑息不暇僕固懷恩爲叛尤甚阽危郭子儀之能軍終免侵軼比昔諸戎於國之功最大爲民之害亦深及勢利日隆盛衰時變冰消瓦解如存若亡竟爲手足之疥焉僖昭之世黃朱迭興竟爲胸背之疽焉手疥背疽誠爲確論

贊曰土德初隆比屋可封朝綱中否邊鄙興戎安史亂

國迴紇恃功恃功伊何咸議姑息民不聊生國殫其力
華夷有截盛衰如織彼既長惡我乃修德疽疥之義百
代可則

舊唐書卷一百九十五

舊唐書卷一百九十五考證


迴紇傳吐蕃徵求無厭○

臣酉

按新書作回紇觀後云

北庭之人既苦回紇乃舉城降則吐蕃當作迴紇無
疑今改正

舊唐書卷一百九十五考證



舊唐書卷一百九十六上

後晉司空同中書門下平章事劉 昫撰

列傳第一百四十六上

吐蕃上

吐蕃在長安之西八千里本漢西羌之地也其種落莫知所出也或云南涼禿髮利鹿孤之後也利鹿孤有子曰樊尼及利鹿孤卒樊尼尚幼弟儁檀嗣位以樊尼爲安西將軍後魏神瑞元年儁檀爲西秦乞佛熾盤所滅樊尼招集餘衆以投沮渠蒙遜蒙遜以爲臨松太守及蒙遜滅樊尼乃率衆西奔濟黃河逾積石於羌中建國

開地千里樊尼威惠夙著爲羣羌所懷皆撫以恩歸
之如市遂改姓爲宰勃野以禿髮爲國號語訛謂之吐
蕃其後子孫繁昌又侵伐不息土宇漸廣歷周及隋猶
隔諸羌未通於中國其國人號其王爲贊普相爲大論
小論以統理國事無文字刻木結繩爲約雖有官不常
厥職臨時統領徵兵用金箭寇至舉烽燧百里一亭用
刑嚴峻小罪剜眼鼻或皮鞭鞭之但隨喜怒而無常科
囚人於地牢深數丈二三年方出之宴異國賓客必驅
犛牛令客自射牲以供饌與其臣下一年一小盟刑羊
狗獼猴先折其足而殺之繼裂其腸而屠之令巫者告

于天地山川日月星辰之神云若心遷變懷奸反覆神
明鑒之同於羊狗三年一大盟夜於壇墀之上與衆陳
設肴饌殺犬馬牛驢以爲牲咒曰爾等咸須同心戮力
共保我家惟天神地祇共知爾志有負此盟使爾身體
屠裂同於此牲其地氣候大寒不生秔稻有青麩麥瑩
豆小麥蕎麥畜多犛牛猪犬羊馬又有天鼠狀如雀鼠
其大如猫皮可爲裘又多金銀銅錫其人或隨畜牧而
不常厥居然頗有城郭其國都城號爲邏些城屋皆平
頭高者至數十尺貴人處於大氊帳各爲拂廬寢處汗
穢絕不櫛沐接手飲酒以氊爲盤捻麩爲椀實以羹酪

并而食之多事獯羝之神人信巫覡不知節候麥熟爲
歲首圍碁陸博吹蠡鳴鼓爲戲弓劍不離身重壯賤老
母拜於子子倨於父出入皆少者在前老者居其後軍
令嚴肅每戰前隊皆死後隊方進重兵死惡病終累代
戰沒以爲甲門臨陣敗北者懸狐尾於其首表其似狐
之怯稠人廣衆必以狗焉其俗耻之以爲次死拜必兩
手據地作狗吠之聲以身再揖而止居父母喪截髮青
黛塗面衣服皆黑旣葬卽吉其贊普死以人殉葬衣服
珍玩及嘗所乘馬弓劍之類皆悉埋之仍於墓上起大
室立土堆插雜木爲祠祭之所貞觀八年其贊普棄宗

弄讚始遣使朝貢弄讚弱冠嗣位性驍武多英略其鄰
國羊同及諸羌竝實伏之太宗遣行人馮德遐往撫慰
之見德遐大悅聞突厥及吐谷渾皆尚公主乃遣使隨
德遐入朝多賚金寶奉表求婚太宗未之許使者旣反
言於弄讚曰初至大國待我甚厚許嫁公主會吐谷渾
王入朝有相離間由是禮薄遂不許嫁弄讚遂與羊同
連發兵以擊吐谷渾吐谷渾不能支遁於青海之上以
避其鋒其國人畜竝爲吐蕃所掠於是進兵攻破党項
及白蘭諸羌率其衆二十餘萬頓於松州西境遣使貢
金帛云來迎公主又謂其屬曰若大國不嫁公主與我

卽當入寇遂進攻松州都督韓威輕騎覘賊反爲所敗
邊人大擾太宗遣吏部尚書侯君集爲當彌道行營大
總管右領軍大將軍執失思力爲白蘭道行軍總管左
武衛將軍牛進達爲闕水道行軍總管右領軍將軍劉
蘭爲洮河道行軍總管率步騎五萬以擊之進達先鋒
自松州夜襲其營斬千餘級弄讚大懼引兵而退遣使
謝罪因復請婚太宗許之弄讚乃遣其相祿東贊致禮
獻金五千兩自餘寶玩數百事貞觀十五年太宗以文
成公主妻之令禮部尚書江夏郡王道宗主婚持節送
公主于吐蕃弄讚率其部兵次栢海親迎于河源見道

宗執子婿之禮甚恭旣而歎大國服飾禮儀之美俯仰
有愧沮之色及與公主歸國謂所親曰我父祖未有通
婚上國者今我得尚大唐公主爲幸實多當爲公主築
一城以誇示後代遂築城邑立棟宇以居處焉公主惡
其人赭面弄讚令國中權且罷之自亦釋氊裘襲絢綺
漸慕華風仍遣酋豪子弟請入國學以習詩書又請中
國識文之人典其表疏太宗伐遼東還遣祿東贊來賀
奉表曰聖天子平定四方日月所照之國竝爲臣妾而
高麗恃遠闕於臣禮天子自領百萬度遼致討隳城陷
陣指日凱旋夷狄纔聞陛下發駕少進之間已聞歸國

鴈飛迅越不及陛下速疾奴忝預子壻喜百常夷夫鴈猶鴈也故作金鵝奉獻其鵝黃金鑄成其高七尺中可實酒三斛二十二年右衛率府長史王玄策使往西域爲中天竺所掠吐蕃發精兵與玄策擊天竺大破之遣使來獻捷高宗嗣位授弄讚爲駙馬都尉封西海郡王賜物二千段弄讚因致書于司徒長孫無忌等云天子初卽位若臣下有不忠之心者當勒兵以赴國除討并獻金銀珠寶十五種請置太宗靈座之前高宗嘉之進封爲賓王賜雜綵三千段因請蠶種及造酒碾磴紙墨之匠並許焉乃刊石像其形列昭陵玄闕之下永徽元

年弄讚卒高宗爲之舉哀遣右武侯將軍鮮于臣濟持節賚璽書弔祭弄讚子早死其孫繼立復號贊普時年幼國事皆委祿東贊祿東姓婁氏雖不識文記而性明毅嚴重講兵訓師雅有節制吐蕃之并諸羌雄霸本土多其謀也初太宗旣許降文成公主贊普使祿東贊來迎召見顧問進對合旨太宗禮之有異諸蕃乃拜祿東贊爲右衛大將軍又以琅邪長公主外孫女段氏妻之祿東贊辭曰臣本國有婦父母所聘情不忍乖且贊普未謁公主陪臣安敢輒娶太宗嘉之欲撫以厚恩雖奇其答而不遂其請祿東贊有子五人長曰贊悉若早死

次欽陵次贊婆次悉多干次勃論及東贊死欽陵兄弟復專其國後與吐谷渾不和龍朔麟德中遞相表奏各論曲直國家依違未爲與奪吐蕃怨怒遂率兵以擊吐谷渾吐谷渾大敗河源王慕容諾曷鉢及弘化公主脫身走投涼州遣使告急咸亨元年四月詔以右威衛大將軍薛仁貴爲邏婆道行軍大總管左衛員外大將軍阿史那道真右衛將軍郭待封爲副率衆十餘萬以討之軍至大非川爲吐蕃大將論欽陵所敗仁貴等並坐除名吐谷渾全國盡沒唯慕容諾曷鉢及其親信數千帳來內屬仍徙於靈州自是吐蕃連歲寇邊當悉等州

諸羌盡降之上元三年進寇鄯廓等州殺掠人吏高宗命尚書左僕射劉仁軌往洮河軍鎮守以禦之儀鳳三年又命中書令李敬玄兼鄯州都督往代仁軌於洮河鎮守仍召募關內河東及諸州驍勇以爲猛士不簡色役亦有嘗任文武官者召入殿庭賜宴遣往擊之又令益州長史李孝逸雋州都督拓王奉等發劔南山南兵募以防禦之其年秋敬玄與工部尚書劉審禮率兵與吐蕃戰于青海官軍敗績審禮沒于陣敬玄按軍不敢救俄而收軍却出頓於承風嶺阻泥溝不能動賊屯於高岡以壓之偏將左領軍員外將軍黑齒常之率敢死

之士五百人夜斫賊營賊遂潰亂自相蹂踐死者三百餘人敬玄遂擁衆鄯州坐改爲衡州刺史往劔南兵募於茂州之西南築安戎城以壓其境俄有生羌爲吐蕃鄉導攻陷其城遂引兵守之時吐蕃盡收羊同党項及諸羌之地東與涼松茂鶴等州相接南至婆羅門西又攻陷龜茲疎勒等四鎮北抵突厥地方萬餘里自漢魏已來西戎之盛未之有也高宗聞審禮等敗沒召侍臣問綏禦之策中書舍人郭正一曰吐蕃作梗年歲已深命將興師相繼不絕空勞士馬虛費糧儲近討則徒損兵威深入則未窮巢穴望少發兵募且遣備邊明烽堠

勿令侵抄使國用豐足人心叶同寬之數年可一舉而滅給事中劉齊賢皇甫文亮等皆言嚴守之便尋而黑齒常之破吐蕃大將贊婆及素和貴於良非川殺獲二千餘級吐蕃遂引退詔以常之爲河源軍使以鎮禦之儀鳳四年贊普卒其子器弩悉弄嗣位復號贊普時年八歲國政復委於欽陵遣其大臣論寒調傍來告喪且請和高宗遣郎將宋令文入蕃會葬永隆元年文成公主薨高宗又遣使弔祭之則天臨朝命文昌右相韋待價爲安息道大總管安西大都護闡溫古爲副永昌元年率兵往征吐蕃遲留不進待價坐流浦州溫古處斬

待價素無統禦之才遂狼狽失據士卒饑饉皆轉死溝壑明年又命文昌右相岑長倩爲武威道行軍大總管以討吐蕃中路退還軍竟不行如意元年吐蕃大首領曷蘇率其所屬并貴川部落請降則天令右玉鈐衛大將軍張玄遇率精卒二萬充安撫使以納之師次大渡水曷蘇事洩爲本國所擒又有大首領咎捶率羌蠻部落八千餘人詣玄遇內附玄遇以其部落置葉川州以咎捶爲刺史仍於大度西山勒石紀功而還長壽元年武威軍總管王孝傑大破吐蕃之衆克復龜茲于闐疎勒碎葉等四鎮乃於龜茲置安西都護府發兵以鎮守

之萬歲登封元年孝傑復爲肅邊道大總管率副總管婁師德與吐蕃將論欽陵贊婆戰于素羅汗山官軍敗績孝傑坐免官萬歲通天元年吐蕃四萬衆奄至涼州城下都督許欽明初不之覺輕出按部遂遇賊拒戰久之力屈爲賊所殺時吐蕃又遣使請和則天將許之論欽陵乃請去安西四鎮兵仍索分十姓之地則天竟不許之吐蕃自論欽陵兄弟專統兵馬欽陵每居中用事諸弟分據方面贊婆則專在東境與中國爲隣三十餘年常爲邊患其兄弟皆有才略諸蕃憚之聖曆二年其贊普器弩悉弄年漸長乃與其大臣論巖等密圖之時

欽陵在外贊普乃佯言將獵召兵執欽陵親黨二千餘人殺之發使召欽陵贊婆等欽陵舉兵不受召贊普自帥衆討之欽陵未戰而潰遂自殺其親信左右同日自殺者百餘人贊婆率所部千餘人及其兄子莽布支等來降則天遣羽林飛騎郊外迎之授贊婆輔國大將軍行右衛大將軍封歸德郡王優賜甚厚仍令領其部兵於洪源谷討擊尋卒贈特進安西大都護久視元年吐蕃又遣其將趨莽布支寇涼州圍逼昌松縣隴右諸軍州大使唐休璟與莽布支戰于洪源谷斬其副將二人獲首二千五百級長安二年贊普率衆萬餘人寇悉州

都督陳大慈與賊凡四戰皆破之斬首千餘級於是吐蕃遣使論彌薩等入朝請求和則天宴之於麟德殿奏百戲於殿庭論彌薩曰臣生於邊荒由來不識中國音樂乞放臣親觀則天許之於是論彌薩等相視笑忭拜謝曰臣自歸投聖朝前後禮數優渥又得親觀奇樂一生所未見自顧微瑣何以仰答天恩區區褊心唯願大家萬歲明年又遣使獻馬千匹金二千兩以求婚則天許之時吐蕃南境屬國泥婆羅門等皆叛贊普自往討之卒於軍中諸子爭立久之國人立器弩悉弄之子棄隸蹄贊爲贊普時年七歲中宗神龍元年吐蕃使來告

喪中宗爲之舉哀廢朝一日俄而贊普之祖母遣其大臣悉薰然來獻方物爲其孫請婚中宗以所養雍王宗禮女爲金城公主許嫁之自是頻歲貢獻景龍三年十一月又遣其大臣尚贊吐等來迎女中宗宴之於苑內毬場命駙馬都尉楊慎交與吐蕃使打毬中宗率侍臣觀之四年正月制曰聖人布化用百姓爲心王者垂仁以八荒無外故能光宅遐邇裁成品物由是隆周理曆恢柔遠之圖強漢乘時建和親之議斯蓋寓長策經邦茂範朕受命上靈克纂洪業庶幾前烈永致和平瞻彼吐蕃僻在西服皇運之始早申朝貢太宗文武聖皇帝

德侔覆載情深億兆思偃兵甲遂通姻好數十年間一方清淨自文成公主化往其國因多變革我之邊隅亟興師旅彼之蕃落頗聞彫弊頃者贊普及祖母可敦酋長等屢披誠款積有歲時思託舊親請崇新好金城公主朕之少女豈不鍾念但爲人父母志息元黎若允乃誠祈更敦和好則邊土寧晏兵役服息遂割深慈爲國大計築茲外館聿膺嘉禮降彼吐蕃贊普卽以今月進發朕親自送于郊外中宗召侍中紀處訥謂曰昔文成公主出降則江夏王送之卿雅識蕃情有安邊之略可爲朕充吐蕃使也處訥拜謝旣而以不練邊事固辭上

又令中書侍郎趙彥昭充使彥昭以既充外使恐失其權寵殊不悅司農卿趙履溫私謂之曰公國之宰輔而爲一介之使不亦鄙乎彥昭曰然計將安出履溫因陰託安樂公主密奏留之於是左衛大將軍楊矩使焉其月帝幸始平縣以送公主設帳殿於百頃泊側引王公宰相及吐蕃使入宴中坐酒闌命吐蕃使進前諭以公主孩幼割慈遠嫁之旨上悲泣歔歔久之因命從臣賦詩餞別曲赦始平縣大辟罪已下百姓給復一年改始平縣爲金城縣又改其地爲鳳池鄉愴別里公主旣至吐蕃別築一城以居之睿宗卽位攝監察御史李知

古上言姚州諸蠻先屬吐蕃請發兵擊之遂令知古徵劔南兵募往經略之蠻酋傍名乃引吐蕃攻知古殺之仍斷其屍以祭天時張玄表爲安西都護又與吐蕃比境互相攻掠吐蕃內雖怨怒外敦和好時楊矩爲鄯州都督吐蕃遣使厚遺之因請河西九曲之地以爲金城公主湯沐之所矩遂奏與之吐蕃旣得九曲其地肥良堪頓兵畜牧又與唐境接近自是復叛始率兵入寇開元二年秋吐蕃大將蚩達焉乞力徐等率衆十餘萬寇臨洮軍又進寇蘭渭等州掠監牧羊馬而去楊矩悔懼飲藥而死玄宗令攝左羽林將軍薛訥及太僕少卿王

駿率兵邀擊之仍下詔將大舉親征召募將士克期進發俄而駿等與賊相遇于渭源之武階驛前軍王海賓力戰死之駿等率兵而進大破吐蕃之衆殺數萬人盡收得所掠羊馬賊餘黨奔北相枕藉而死洮水爲之不流上遂罷親征命紫微舍人倪若水往按軍實仍弔祭王海賓而還吐蕃遣其大臣宗俄因子至洮河祭其死亡之士仍款塞請和上不許之自是連年犯邊郭知運王君奐相次爲河西節度使以捍之吐蕃旣自恃兵強每通表疏求敵國之禮言詞悖慢上甚怒之及封禪禮畢中書令張說奏言吐蕃醜逆誠負萬誅然又事征討

實爲勞弊且十數年甘涼河鄯徵發不息縱令屢勝亦不能補聞其悔過請和惟陛下遣使許其稽顙內屬以息邊境則蒼生幸甚上曰待吾與王君奐籌之說出謂源乾曜曰君奐勇而無謀常思僥倖兩國和好何以爲功若入陳謀則吾計不遂矣尋而君奐入朝奏事遂請率兵深入以討之十五年正月君奐率兵破吐蕃於青海之西虜其輜重及羊馬而還先是吐蕃大將悉諾邏率衆入攻大斗谷又移攻甘州焚燒市里君奐畏其鋒不敢出戰會大雪賊凍死者甚衆遂取積石軍西路而還君奐先令人潛入賊境於其歸路燒草悉諾邏軍還

至大非山將士息甲牧馬而野草皆盡馬死過半君奭與秦州都督張景順等率衆襲其後入至青海之西時海水冰合將士並乘冰而渡會悉諾邏已渡大非川輜重及疲兵尚在青海之側君奭縱兵俘之而還其年九月吐蕃大將悉諾邏恭祿及燭龍莽布支攻陷瓜州城執刺史田元獻及王君奭之父壽盡取城中軍資及倉糧仍毀其城而去又進攻玉門軍及常樂縣縣令賈師順嬰城固守凡八十日賊遂引退俄而王君奭爲廻紇餘黨所殺乃命兵部尚書蕭嵩爲河西節度使以建康軍使左金吾將軍張守珪爲瓜州刺史修築州城招輯

百姓令其復業時悉諾邏恭祿威名甚振蕭嵩乃縱反間於吐蕃云其與中國潛通贊普遂召而誅之明年秋吐蕃大將悉末朗復率衆攻瓜州守珪出兵擊走之隴右節度使鄯州都督張忠亮引兵至青海西南渴波谷與吐蕃接戰大破之俄而積石莫門兩軍兵馬總至與忠亮合勢追討破其大莫門城生擒千餘人獲馬一千匹犂牛五百頭器仗衣資甚衆又焚其駱駝橋而還八月蕭嵩又遣副將杜賓客率弩手四千人與吐蕃戰于祁連城下自辰至暮散而復合賊徒大潰臨戰斬其副將一人賊敗散走投山哭聲四合初上聞吐蕃重來入

寇謂侍臣曰吐蕃驕暴恃力而來朕今按地圖審利害親指授將帥破之必矣數日而露布至十七年朔方大總管信安王禕又率兵赴隴右拔其石堡城斬首四百餘級生擒二百餘口遂於石堡城置振武軍仍獻其俘囚于太廟於是吐蕃頻遣使請和忠王友皇甫惟明因奏事面陳通和之便上曰吐蕃贊普往年嘗與朕書悖慢無禮朕意欲討之何得和也惟明曰開元之初贊普幼稚豈能如此必是在邊軍將務邀一時之功僞作此書激怒陛下兩國旣鬪興師動衆因利乘便公行隱盜僞作功狀以希勲爵所損鉅萬何益國家今河西隴右

百姓疲竭事皆由此若陛下遣使往視金城公主因與贊普面約通和令其稽顙稱臣永息邊境此永代安人之道也上然其言因令惟明及內侍張元方充使往問吐蕃惟明元方等至吐蕃旣見贊普及公主具宣上意贊普等欣然請和盡出貞觀已來前後勅書以示惟明等令其重臣名悉獵隨惟明等入朝上表曰外甥是先皇帝舅宿親又蒙降金城公主遂和同爲一家天下百姓普皆安樂中間爲張玄表李知古等東西兩處先動兵馬侵抄吐蕃邊將所以互相征討迄至今日遂成豐隙外甥以先代文成公主今金城公主之故深識尊卑

豈敢失禮又緣年小在邊將讒構鬪亂令舅致怪伏乞垂察追留死將萬足前數度使人入朝皆被邊將不許所以不敢自奏去冬公主遣使人婁衆失若將狀專往蒙降使看公主來外甥不勝喜荷護遣諭名悉獵及副使押衙將軍浪些紇夜悉獵入朝奏取進止兩國事意悉獵所知外甥蕃中已處分邊將不許抄掠若有漢人來投便令却送伏望皇帝舅遠察赤心許依舊好長令百姓快樂如蒙聖恩千年萬歲外甥終不敢先違盟誓謹奉金胡瓶一金盤一金椀一馬腦盃一零羊衫段一謹充微國之禮金城公主又別進金鴨盤盞雜器物

等十八年十月名悉獵等至京師上御宣政殿列羽林仗以見之悉獵頗曉書記先曾迎金城公主至長安當時朝廷皆稱其才辯及是上引入內宴與語甚禮之賜紫袍金帶及魚袋并時服繒綵銀盤胡瓶仍於別館供擬甚厚悉獵受袍帶器物而却進魚袋辭曰本國無此章服不敢當殊異之賞上嘉而許之詔御史大夫崔琳充使報聘仍於赤嶺各豎分界之碑約以更不相侵時吐蕃使奏云公主請毛詩禮記左傳文選各一部制令祕書省寫與之正字于休烈上疏請曰臣聞戎狄國之寇也經籍國之典也戎之生心不可以無備典有恒制

不可以假人傳曰裔不謀夏夷不亂華所以格其非心在乎有備無患昔東平王入朝求史記諸子漢帝不與蓋以史記多兵謀諸子雜詭術夫以東平漢之懿戚尚不欲示征戰之書今西戎國之寇讐豈可貽經典之事且臣聞吐蕃之性慄悍果決敏情持銳善學不廻若達於書必能知戰深於詩則知武夫有師干之試深於禮則知月令有廢興之兵深於傳則知用師多詭詐之計深於文則知往來有書檄之制何異借寇兵而資盜糧也臣聞魯秉周禮齊不加兵吳獲乘車楚疲奔命一以守典存國一以喪法危邦可取鑒也且公主下嫁從人

遠適異國合慕夷禮返求良書愚臣料之恐非公主本意也慮有奔北之類勸教於中若陛下慮失蕃情以備國信必不得已請去春秋當周德既衰諸侯強盛禮樂自出戰伐交興情僞於是乎生變詐於是乎起則有以臣召君之事取威定霸之名若與此書國之患也傳曰于奚請曲縣鞶纓仲尼云惜也不如多與之邑惟名與器不可假人狄固貪婪貴貨易土正可錫之錦綺厚以玉帛何必率從其求以資其智臣忝叨列位職刊祕籍實痛經典棄在戎夷昧死上聞惟陛下深察疏奏不省二十一年又制工部尚書李暉往聘吐蕃每唐使入境

所在盛陳甲兵及騎馬以矜其精銳二十二年遣將軍李佺於赤嶺與吐蕃分界立碑二十四年正月吐蕃遣使貢方物金銀器玩數百事皆形制奇異上令列於提象門外以示百寮其年吐蕃西擊勃律遣使來告急上使報吐蕃令其罷兵吐蕃不受詔遂攻破勃律國上甚怒之時散騎常侍崔希逸爲河西節度使於涼州鎮守時吐蕃與漢樹柵爲界置守捉使希逸謂吐蕃將乞力徐曰兩國和好何須守捉妨人耕種請皆罷之以成家豈不善也乞力徐報曰常侍忠厚必是誠言但恐朝廷未必皆相信任萬一有人交構掩吾不備後悔無益

也希逸固請之遂發使與乞力徐殺白狗爲盟各去守備於是吐蕃畜牧被野俄而希逸僉人孫誨入朝奏事誨欲自邀其功因奏言吐蕃無備若發兵掩之必剋捷上使內給事趙惠琮與孫誨馳往觀察事宜惠琮等至涼州遂矯詔令希逸掩襲之希逸不得已而從之大破吐蕃於青海之上殺獲甚衆乞力徐輕身遁逸惠琮孫誨皆加厚賞吐蕃自是復絕朝貢希逸以失信怏怏在軍不得志俄遷爲河南尹行至京師與趙惠琮俱見白狗爲祟相次而死孫誨亦以罪被戮詔以岐州刺史蕭颯爲戶部侍郎判涼州事代希逸爲河西節度使鄯州

都督杜希望爲隴右節度使太僕卿王昊爲益州長史
劍南節度使分道經略以討吐蕃仍令毀其分界之碑
二十六年四月杜希望率衆攻吐蕃新城拔之以其城
爲威武軍發兵一千以鎮之其年七月希望又從鄯州
發兵奪吐蕃河橋於河左築鹽泉城吐蕃將兵三萬人
以拒官軍希望引衆擊破之因於鹽泉城置鎮西軍時
王昊又率劍南兵募攻其安戎城先於安戎城左右築
兩城以爲攻拒之所頓兵於蓬婆嶺下運劍南道資糧
以守之其年九月吐蕃悉銳以救安戎城官軍大敗兩
城並爲賊所陷昊脫身走免將士已下數萬人及軍糧

資仗等並沒于賊昊坐左遷括州刺史初昊之在軍謬
賞其子錢帛萬計并擅與紫袍等所費鉅萬坐是尋又
重貶爲端州高要尉而死二十七年七月吐蕃又寇白
草安人等軍勅臨洮朔方等軍分兵救援時吐蕃於中
路屯兵斷臨洮軍之路白水軍守捉使高東于拒守連
旬俄而賊退蕭昺遣偏將掩其後擊破之王昊旣敗之
後詔以華州刺史張宥爲益州長史劍南防禦使主客
員外郎章仇兼瓊爲益州司馬防禦副使宥旣文吏素
無攻戰之策兼瓊遂專其戎事俄而兼瓊入奏盛陳攻
取安戎之策上甚悅徙張宥爲光祿卿拔兼瓊令知益

州長史事代張宥節度仍爲之親畫取城之計二十八年春兼瓊密與安戎城中吐蕃翟都局及維州別駕董承宴等通謀都局等遂翻城歸款因引官軍入城盡殺吐蕃將士使監察御史許遠率兵鎮守上聞之甚悅中書令李林甫等上表曰伏以吐蕃此城正當衝要憑險自固恃以窺邊積年已來蟻聚爲患縱有百萬之衆難以施功陛下親紆祕策不興師旅頃令中使李思敬曉喻羌族莫不懷恩翻然改圖自相謀陷神算運於不測睿略通於未然累載逋誅一朝蕩滅又臣等今日奏事陛下從容問臣等曰卿等但看四夷不久當漸摧喪德

音纜降遽聞戎捷則知聖與天合應如響至前古已來所未有也請宣示百寮編諸史策手制答曰此城儀鳳年中羌引吐蕃遂被固守歲月旣久攻伐亦多其地險阻非力所制朝廷羣議不合取之朕以小蕃無知事須處置授以奇計所以行之獲彼戎心歸我城守有足爲慰也其年十月吐蕃又引衆寇安戎城及維州章仇兼瓊遣裨將率衆禦之仍發關中曠騎以救援焉時屬凝寒賊久之自引退詔改安戎城爲平戎城二十九年春金城公主薨吐蕃遣使來告哀仍請和上不許之使到數月後始爲公主舉哀於光順門外輟朝三日六月吐

蕃四十萬攻承風堡至河源軍西入長寧橋至安仁軍
渾崖峯騎將盛希液以衆五千攻而破之十二月吐蕃
又襲石堡城節度使蓋嘉運不能守玄宗憤之天寶初
令皇甫惟明王忠嗣爲隴右節度皆不能克七載以哥
舒翰爲隴右節度使攻而拔之改石堡城爲神武軍天
寶十四載贊普乞黎蘇籠獵贊死大臣立其子婆悉籠
獵贊爲主復爲贊普玄宗遣京兆少尹崔光遠兼御史
中丞持節賫國信冊命弔祭之及還而安祿山已竊據
洛陽以河隴兵募令哥舒翰爲將屯潼關昔秦以隴山
已西爲隴西郡漢懷匈奴於河右置姑臧張掖酒泉伊
吾等郡又於磧外置西域都護控引胡國又分隴西爲
金城西平等郡襍以氐羌居之歷代喪亂不爲賢豪所
據則爲達夷侵廢迨千年矣武德初薛仁果奄有隴上
之地至於河虜李敷盡有涼州之城通於磧外貞觀中
李靖破吐谷渾侯君集平高昌阿史那社爾開西域置
四鎮前王之所未伏盡爲臣妾秦漢之封域得議其土
境耶於是歲調山東丁男爲戍卒繒帛爲軍資有屯田
以資糗糧收使以媯羊馬大軍萬人小軍千人烽戍邏
卒萬里相繼以却於強敵隴右鄯州爲節度河西涼州
爲節度安西北庭亦置節度關內則於靈州置朔方節

度又有受降城單于都護庭爲之藩衛及潼關失守河
洛阻兵於是盡徵河隴朔方之將鎮兵入靖國難謂之
行營曩時軍營邊州無備預矣乾元之後吐蕃乘我間
隙日蹙邊城或爲虜掠傷殺或轉死溝壑數年之後鳳
翔之西邠州之北盡蕃戎之境堙沒者數十州肅宗元
年建寅月甲辰吐蕃遣使來朝請和勅宰相郭子儀蕭
華張遵慶等於中書設宴將詣光宅寺爲盟誓取三牲
血歃之無向佛寺之事請明日須於鴻臚寺歃血以申
蕃戎之禮從之寶應元年六月吐蕃使燭番莽耳等二
人貢方物入朝乃於延英殿引見勞賜各有差而劍南

西山又與吐蕃氏羌隣接武德已來開置州縣立軍防
卽漢之笮路乾元之後亦陷於吐蕃寶應二年三月遣
左散騎常侍兼御史大夫李之芳左庶子兼御史中丞
崔倫使于吐蕃至其境而留之廣德元年九月吐蕃寇
陷涇州十月寇邠州又陷奉天縣遣中書令郭子儀西
禦吐蕃以吐谷渾党項羌之衆二十餘萬自龍光度而
東郭子儀退軍車駕幸陝州京師失守降將高暉引吐
蕃入上都城與吐蕃大將馬重英等立故邠王男廣武
王承宏爲帝立年號大赦署置官員尋以司封崔瓌等
爲相郭子儀退軍南保商州吐蕃居城十五日退官軍

收上都以郭子儀爲留守初車駕東幸衣冠戚里盡南
投荆襄及隱竄山谷於是六軍將士持兵剽劫所在阻
絕郭子儀領部曲數百人及其妻子僕從南入牛心谷
駝馬車牛數百兩子儀遲留未知所適行軍判官中書
舍人王延昌監察御史李萼謂子儀曰令公身爲元帥
主上蒙塵于外家國之事一至於此今吐蕃之勢日逼
豈可懷安于谷中何不南趨商州漸赴行在子儀遽從
之延昌曰吐蕃知令公南行必分兵來逼若當大路事
卽危矣不如取玉山路而去出其不意子儀又從之延
昌與李萼皆從子儀子儀之隊千餘人山路狹隘連延

百餘里人不得馳延昌與萼恐狹徑被追前後不相救
至倒迴口遂與子儀別行踰絕澗登七盤趨于商州先
是六軍將張知節與麾下數百人自城奔于商州大掠
避難朝官士庶及居人資財鞍馬已有日矣延昌與萼
旣至說知節曰將軍身掌禁兵軍敗而不赴行在又恣
其下虜掠何所歸乎今郭令公元帥也已欲至洛南將
軍若整頓士卒諭以禍福請令公來撫之以圖收長安
此則將軍非常之功也知節大悅其時諸軍將臧希讓
高昇彭體盈李惟誥等數人各有部曲率其數十騎相
次而至又從其計皆相率爲軍約不侵暴延昌留于軍

中主約萼以數騎往迎子儀去洛南十餘里及之遂與子儀迴至商州諸將大喜皆遵其約束吐蕃將入京師也前光祿卿殷仲卿逃難而出鞍馬衣服盡爲土賊所掠仲卿至藍田糾合散兵及諸驍勇願從者百餘人南保藍田以拒吐蕃其衆漸振至于千人子儀旣至商州未知仲卿之舉募人往探賊勢羽林將軍長孫全緒請行以二百騎隸之又令太子賓客第五琦攝京兆尹同收長安全緒至韓公堆晝則擊鼓廣張旗幟夜則多燃火以疑吐蕃仲卿探知官軍其勢益壯遂相爲表裏以狀聞于子儀仲卿二百餘騎遊奕直渡澧水吐蕃懼問

百姓百姓皆給之曰郭令公自商州領衆却收長安大軍不知其數賊以爲然遂抽軍而還餘衆尚在城軍將王撫及御史大夫王仲昇頓兵自苑中入椎鼓大呼仲卿之師又入城吐蕃皆奔走乃收上都郭子儀乘之鼓行入長安人心乃安吐蕃退至鳳翔節度孫志直閉門拒之吐蕃圍守數日會鎮西節度兼御史中丞馬璘領精騎千餘自河西救楊志烈迴引兵入城遲明單騎持滿直衝賊衆左右願從者百餘騎璘奮擊大呼賊徒披靡無敢當者賊疲而歸賊衆恃其驍勇翌日又逼城請戰璘被甲開懸門賊乃抽退皆曰此將不惜死不可當

且避之又復居原會成渭之地十二月乘輿還上都二年五月放李之芳還九月叛將僕射大寧郡王僕固懷恩自靈武遣其黨范志誠任敷等引吐蕃吐谷渾之衆來犯王畿十月懷恩之衆至邠州挑戰節度白孝德及副元帥先鋒郭鋒嬰城拒之以挫其鋒賊衆遂逼奉天縣西二十里爲營郭子儀屯於奉天又按軍不戰郭鋒於邠州西三十里合精騎二百五十人步卒五十人斫懷恩營破五千衆斬首千餘級生擒八十五人降其大將四人馬五百匹十一月僕固懷恩引吐蕃之衆退廣德二年河西節度楊志烈被圍守數年以孤城無援乃

跳身西投甘州涼州又陷於寇永泰元年三月吐蕃請和遣宰相元載杜鴻漸等於興唐寺與之盟而罷秋九月僕固懷恩誘吐蕃迴紇之衆南犯王畿吐蕃大將尚結息贊磨尚息東贊尚野息及馬重英率二十萬衆至奉天界邠州節度使白孝德不能禦京城戒嚴先是朔方先鋒兵馬使渾日進孫守亮屯軍於奉天以拒之於是詔追副元帥郭子儀於河中府領衆赴援屯於涇陽諸將各屯守要害初吐蕃列營奉天渾日進單騎衝之驍騎二百人繼進衝突其營左右擊刺賊徒驚駭無不應弦而斃日進挾一蕃將躍馬而歸蕃將奮身失其撒

飯一日進之衆無中鋒鏑者軍中望而益振明日吐蕃
悉衆圍之日進命拋車夾石投之雜以弓弩賊死傷衆
數日斂軍回營尋又日進夜斫賊營於梁毋神下殺千
餘人生擒五百人獲駝馬器械上又下詔親征括朝官
馬京城置團練鎮西節度馬磷遇吐蕃遊奕四百餘人
於武功東原使五十人擊而盡殺之無噍類自十七日
至二十五日晚際始止議者以爲天助吐蕃移營於醴
泉縣九峽山北因攻掠醴泉京城大駭人皆空室大戶
鑿竇以出逆黨任敷以兵五千餘人犯白水縣渾日進
露布而至屯於奉天馬嵬店今月十九日已後至二十

五日已前交戰二百餘陣破吐蕃一萬餘衆斬首五千
級生擒一百六十人馬一千二百四十二匹駝一百一
十五頭器械幡旗共三萬餘事朝官震懼家口迴避者
十室八九禁之不止自前年吐蕃犯王畿後於中渭橋
鄠豐城以營兵至是功畢吐蕃退至永壽北遇迴紇之
衆雖聞懷恩死皆悖其衆相誘而奔復來寇至奉天兩
蕃猜貳爭長別爲營壘吐蕃遊奕至窯底吐蕃又至馬
嵬店因縱火焚居人廬舍而退迴紇三千騎詣涇陽降
款請擊吐蕃爲效子儀許之於是朔方先鋒兵馬使開
府南陽郡王白元光與迴紇合於涇陽靈臺縣東五十

里攻破吐蕃斬首及生擒獲駝馬牛羊甚衆上停親征
京師解嚴宰臣上表稱賀

舊唐書卷一百九十六上考證
吐蕃傳上遂復親征○臣酉按新書作罷親征復字當
是罷字之訛今改正

舊唐書卷一百九十六上

舊唐書卷一百九十六上考證


吐蕃傳上遂復親征○

臣酉


按新書作罷親征復字當

是罷字之訛今改正

失其撒飯一○疑有脫誤



舊唐書卷一百九十六上考證



舊唐書卷一百九十六下

後晉司空同中書門下平章事劉昫撰

列傳第一百四十六下

吐蕃下

永泰二年二月命大理少卿兼御史中丞楊濟修好于吐蕃四月吐蕃遣首領論泣藏等百餘人隨濟來朝且謝申好大曆二年十月靈州破吐蕃二萬餘衆生擒五百人獲馬一千五百四十一月和蕃使檢校戶部尚書兼御史大夫薛景仙自吐蕃使還首領論泣陵隨景仙來朝景仙奏云贊普請以鳳林關爲界俄又遣使路悉

等十五人來朝三年八月吐蕃十萬寇靈武大將尚悉
摩寇邠州邠寧節度使馬璘破二萬餘衆擒其俘以獻
之九月寇靈州朔方騎將白元光破之俄又復破二萬
衆於靈武獲羊馬數千計關內副元帥郭子儀於靈州
破吐蕃六萬餘衆十二月以蕃寇歲犯西疆增修鎮守
乃移馬璘鎮涇州仍爲涇原節度使劍南西川亦破吐
蕃萬餘衆五年五月徙置安悉拓靜恭五州于山陵要
害之地以備吐蕃八年秋吐蕃六萬騎寇靈武蹂踐我
禾稼而去十月寇涇邠等州郭子儀遣先鋒將渾瑊與
賊戰于宜祿我師不利副將史籍等三人死之村墅居

人爲驅掠者凡千餘人是夜瑊收合散卒襲賊營會馬
璘亦襲其輜重凡殺數千人賊遂潰子儀大破吐蕃十
餘萬衆初吐蕃犯我邠郊馬璘以精卒二千餘人潛夜
掩賊營射賊豹皮將中目賊衆扶之號泣遂舉營遁去
璘因收獲朔方兵健二百餘人百姓七百餘人駝馬數
百匹九年四月以吐蕃侵擾預爲邊備乃降勅宜令子
儀以上郡北地四塞五原義渠稽胡鮮卑雜種步馬五
萬衆嚴會枸邑克壯舊軍抱玉以晉之高都韓之上黨
河湟義徒汧隴少年凡三萬衆橫絕高壁斜界連營馬
璘以西域前庭車師後部兼廣武之戍下蔡之徭凡三

萬衆屯于泗中張大軍之援忠誠以武落別授右地奇
鋒凡二萬衆出岐陽而北會希讓以三輔太常之徒六
郡良家之子自渭上而西合汴宋淄清河陽幽薊總四
萬衆分列前後魏成德昭義永地總六萬衆大舒左右
朕內整禁旅親誓諸將資以千金之費錫以六牧之馬
其戎裝戰器軍用邊儲各有司存素皆精辦咨爾將相
文武宣力之臣夫師克在和善戰不陣各宜保據疆界
屯據要衝斥埃惟明首尾相應若旣悔過何必勞人如
或不恭自當伐罪然後眷求統一以制諸軍進取之宜
俟於後命十一年正月劔南節度使崔寧大破吐蕃故

洪等四節度兼突厥吐渾氏蠻羌党項等二十餘萬衆
斬首萬餘級生擒螭城兵馬使一千三百五十人獻于
闕下牛羊及軍資器械不可勝紀十二年九月入寇坊
州掠党項羊馬而去十月崔寧破吐蕃望漢城十四年
八月命太常少卿韋倫持節使吐蕃統蕃俘五百人歸
之十月吐蕃率南蠻衆二十萬來寇一入茂州過汶川
及灌口一入扶文過方維白壩一自黎雅過邛峽關連
陷郡邑乃發禁兵四千人及幽州兵五千人同討大破
之建中元年四月韋倫至自大曆中聘使前後數輩皆
留之不遣俘獲其人必遣中官部統徙江嶺因緣求財

及給養之費不勝其弊去年冬吐蕃大興師以三道來
侵會德宗初卽位以德綏四方徵其俘囚五百餘人各
給衣一襲使倫統還其國與之約和勅邊將無得侵伐
吐蕃始聞歸其人不之信及蕃俘入境部落皆畏威懷
惠其替普乞立贊謂倫曰不知是來也而有三恨奈何
倫曰未達所謂乞立贊曰不知大國之喪而弔不及哀
一也不知山陵之期而賻不成禮二也不知皇帝舅聖
明繼立已發衆軍三道連衡今靈武之師聞命輟已而
山南之師已入扶文蜀師已趨灌口追且不及是三恨
也乃發使奉贄不二旬而復命蜀帥上所獲戎俘有司

請準舊事頒爲徒隸上曰要約著矣言庸二乎乃各給
縑二匹衣一襲而歸之五月以韋倫爲太常卿復使吐
蕃其冬遣宰相論欽明思等五十五人隨倫至且獻方
物吐蕃見倫再至甚歡旣就館聲樂以娛之留九日而
還兼遣其渠帥報命二年十二月入蕃使判官常魯與
吐蕃使論悉諾羅等至自蕃中初魯與其使崔漢衡至
列館贊普令止之先命取國信勅旣而使謂漢衡曰來
勅云所貢獻物並領訖今賜外甥少信物至領取我大
蕃與唐舅甥國耳何得以臣禮見處又所欲定界雲州
之西請以賀蘭山爲界其盟約請依景龍二年勅書云

唐使到彼外甥先與盟誓蕃使到此阿舅亦親與盟乃邀漢衡遣使奏定魯使還奏焉爲改勅書以貢獻爲進以賜爲寄以領取爲領之且謂曰前相楊炎不循故事致此誤爾其定界盟竝從之三年四月放先沒蕃將士僧尼等八百人歸還報歸蕃俘也九月和蕃使殿中少監兼御史中丞崔漢衡與蕃使區類贊至時吐蕃大相尚結息忍而好殺以嘗覆敗於劔南思刷其耻不肯約和其次相尚結贊有材畧因言於贊普請定界明約以息邊人贊普然之竟以結贊代結息爲大相終約和好期以十月十五日會盟於境上以崔漢衡爲鴻臚卿以

都官員外郎樊澤兼御史中丞充入蕃計會使初漢衡與吐蕃約定月日盟誓漢衡到商量未決已過其期遂命澤詣結贊復定盟會期且告遣隴右節度使張鎰與之同盟澤至故原州與結贊相見以來年正月十五日會盟于清水西四年正月詔張鎰與尚結贊盟於清水將盟鎰與結贊約各以二千人赴壇所執兵者半之列於壇外二百步散從者半之分立壇下鎰與賓佐齊映齊抗及會盟官崔漢衡樊澤常魯于頔等七人皆朝服結贊與其本國將相論悉頰藏論臧熱論利陀斯官者論力徐等亦七人俱升壇爲盟初約漢以牛蕃以馬鎰

耻與之盟將殺其禮乃謂結贊曰漢非牛不田蕃非馬
不行今請以羊豕犬三物代之結贊許諾塞外無豕結
贊請出羝羊鎰出犬及羊乃於壇北刑之雜血二器而
歆盟文唐有天下恢奄禹跡舟車所至莫不率俾以累
聖重光歷年惟永彰王者之丕業被四海之聲教與吐
蕃贊普代爲婚姻固結隣好安危同體甥舅之國將二
百年其間或因小忿棄惠爲讐封疆騷然靡有寧歲皇
帝踐祚愍茲黎元俾釋俘隸以歸蕃落蕃國展禮同茲
叶和行人往復累布成命是必詐謀不起兵車不用矣
彼猶以一兩國之要求之永久古有結盟今請用之國家

務息邊人外其故地棄利蹈義堅盟從約今國家所守
界涇州西至彈箏峽西口隴州西至清水縣鳳州西至
同谷縣暨劔南西山大渡河東爲漢界蕃國守鎮在蘭
渭原會西至臨洮東至成州抵劔南西界磨些諸蠻大
渡水西南爲蕃界其兵馬鎮守之處州縣見有居人彼
此兩邊見屬漢諸蠻以今所分見住處依前爲定其黃
河以北從故新泉軍直北至大磧直南至賀蘭山駱駝
嶺爲界中間悉爲閑田盟文有所不載者蕃有兵馬處
蕃守漢有兵馬處漢守並依見守不得侵越其先未有
兵馬處不得新置并築城堡耕種今二國將相受辭而

會齋戒將事告天地山川之神惟神照臨無得愆墜其盟文藏於宗廟副在有司二國之成其永保之結贊亦出盟文不加於坎但埋牲而已盟畢結贊請益就壇之西南隅佛幄中焚香爲誓誓之畢復升壇飲酒獻酬之禮各用其物以將厚意而歸二月命崔漢衡持節答蕃遣區頰贊等歸上初令宰相尚書與蕃相區頰贊盟於豐邑里壇所盟以清水之會不定遂罷因留頰贊未遣復令漢衡使於贊普六月答蕃使判官于頔與蕃使論頰沒藏等至自青海七月以禮部尚書李揆加御史大夫爲入蕃會盟使又命宰相李忠臣盧杞關播右僕射

崔寧工部尚書喬琳御史大夫于頔太府卿張獻恭司農卿段秀實少府監李昌夔京兆尹王翊左金吾衛將軍渾瑊等與區頰贊等會盟於壇所初于頔至自蕃中與尚結贊約疆場既定請歸其使從之以豐邑坊盟壇在京城之內非便請卜壇於京城之西其禮如清水之儀先盟二日命有司告太廟監官致齋三日朝服陞壇關播跪讀盟文盟畢宴賜而遣之興元元年二月以右散騎常侍兼御史大夫于頔往涇州已來宣慰吐蕃仍與州府計會頔通時吐蕃款塞請以兵助平國難故遣使焉四月命太常少卿兼御史中丞沈房爲入蕃計會

及安西北庭宣慰使是月渾瑊與吐蕃論莽羅率衆大破朱泚將韓旻張廷芝宋歸朝等於武功之武亭川斬首萬餘級貞元二年命倉部郎中兼侍御史趙聿爲入吐蕃使八月吐蕃寇涇隴邠寧數道掠人畜取禾稼西境騷然諸道節度及軍鎮咸閉壁自守而已京師戒嚴上遣左金吾將軍張獻甫與神策將李昇曇蘇清沔等統兵屯於咸陽召河中節度駱元光率衆戍咸陽以援之九月以吐蕃遊騎及於好畤上復遣張獻甫等統兵屯於咸陽又詔遣左監門將軍康成使於吐蕃初吐蕃大相尚結贊累遣使請盟會定界乃命成使之至上砦

原與結贊相見令其使論乞陀與成同來是月鳳翔節度使李晟以吐蕃侵軼遣其將王佖夜襲賊營率驍勇三千人入汧陽誡之曰賊之大衆當過城下無擊其首尾首尾雖敗中軍力全若合勢攻之汝必受其弊但候其前軍已過見五方旗虎豹衣則其中軍也出其不意乃是奇功泌如其言出擊之賊衆果敗副將史廷玉力戰死之又寇鳳翔城下李晟出兵禦之一夕而退十月李晟遣兵襲吐蕃之堆沙堡大破之焚其歸積斬蕃酋扈屈律設贊等七人傳首京師十一月吐蕃陷鹽州初賊來也刺史杜彥光使以牛酒犒之吐蕃謂曰我欲州

城居之聽爾率其人而去彥光乃悉衆奔鄜州十二月
陷夏州刺史拓拔乾暉率衆而去復據其城又寇銀州
素無城壁人皆奔散三年春命檢校左庶子兼御史中
丞崔澣爲入吐蕃使相次又遣左庶子李銛使之河東
保寧等道節度使馬燧來朝初尚結贊旣陷鹽夏等州
各留千餘人守之結贊大衆屯於鳴沙自去冬及春羊
馬多死糧餉不給時詔遣華州潼關節度駱元光邠寧
節度韓遊瓌統衆與鳳翔鄜邠及諸道戍卒屯於塞上
又命燧率師次於石州分兵隔河與元光等犄角討之
結贊聞而大懼累遣使請和仍約盟會上皆不許又遣

其大將論頰熟厚禮卑詞求燧請盟燧以奏焉上又不
許惟促其合勢討逐燧喜賂信詐乃與頰熟俱入朝盛
言其可保信許盟約上於是從之燧旣赴朝也諸軍但
閉壁而已結贊遽悉其衆棄夏州而歸馬旣多死有徒
行者及是夏平涼之會竟渝盟馬燧亦由此失兵柄而
奉朝請矣四月崔澣至自鳴沙初澣至鳴沙與尚結贊
相見詢問其違約陷鹽夏州之故對曰本以定界碑被
牽倒恐二國背盟相侵故造境上請修舊好又蕃軍頃
年破朱泚之衆於武功未獲酬償所以來耳及徙涇州
其節度使閉城自守音問莫達又徙鳳翔請通使於李

令公亦不見納及遣康成王真之來皆不能達大國之命日望大臣充使兼展情禮實無至者乃引軍還及鹽夏二州之師二州懼我之衆請以城與我求全而歸非我所攻陷也今君以國親將命若結好復盟蕃之願也盟會之期及定界之所唯命是聽君歸奏決定當以鹽夏相還也又云清水之會同盟者少是以和好輕慢不成今蕃相及元帥已下凡二十一人赴靈州節度使杜希全稟性和善外境所知請令主盟會涇州節度李觀亦請同主之又同章表上聞澣誘賂蕃中給役者求其人馬真數凡五萬九千餘人馬八萬六千餘匹可戰者

僅三萬人餘悉童幼備數而已是日改崔澣爲鴻臚卿再入吐蕃令澣報尚結贊曰杜希全職在靈州不可出境李觀今已改官以侍中渾瑊充盟會使約以五月二十四日復盟於清水又令告以鹽夏二州歸于我纔就盟會上疑蕃情不實以得州爲信焉五月渾瑊以充盟會使來辭且受命以兵部尚書崔漢衡爲盟會副使司勳員外郎鄭叔矩爲判官渾瑊赴會盟所上令瑊統衆二萬餘人遣華州潼關節度駱元光赴之上令宰臣召吐蕃使論泣贊等於中書議會盟之所初崔澣與尚結贊約復會於清水且先歸我鹽夏二州結贊云清水非

吉地請會於原州之土梨樹又請盟畢歸二州澣遣使與泣贊等同奏上務懷柔遠人皆從之約以五月十五日盟于土梨樹上召宰臣謀之先是左神策將馬有麟奏土梨樹地多險隘恐蕃軍隱伏不利于我平涼川四隅坦平且近涇州就之爲便由是乃定盟所於平涼川時蕃使論泣贊已復命遽追還告而遣之渾瑊與尚結贊會於平涼初瑊與結贊約以兵三千人列於壇之東西散手四百人至壇下及將盟又約各益遊軍相覘伺結贊擁精騎數萬於壇西蕃之遊軍貫穿我師瑊之將梁奉貞率六十騎爲遊軍纔至蕃中皆被執留瑊不虞

也結贊又遣人請瑊曰請侍中已下服衣冠劔珮以俟命蓋誘其下馬將劫持之城與崔漢衡監軍特進宋鳳朝等皆入幕次瑊無他慮結贊命伐鼓三聲其衆呼譟而至瑊遽出自幕後遇得他馬跨而奔歸時馬不加銜瑊伏於鬣而手加之凡馳十餘里銜方及口故追騎之矢過而不傷焉唯瑊之裨將辛榮招合數百人拒北阜與賊接戰須臾賊衆四合榮力屈而降鳳朝及瑊判官韓弁並爲亂兵所殺漢衡及中官劉延邕俱文珍李清朝漢衡判官鄭叔矩路泌掌書記袁同直大將扶餘準馬寧及神策鳳翔河東大將孟日華李至言樂演明范

澄馬弇等六十餘人皆陷焉餘將士及夫役死者四五
百人驅掠者千餘人咸被辱奪其衣初漢衡爲亂兵所
擊其從吏呂溫以身蔽之刃中溫而漢衡獲免漢衡乃
夷言謂執者曰我漢使崔尚書也結贊與我善如若殺
我結贊亦殺汝乃捨之盡驅而西旣已面縛各以一木
自領至趾約於身以毛繩三束之又以毛繩連其髮而
約之夜皆踣於地以髮繩各繫一撮又以毛罽都覆之
守衛者卧其上以防其亡逸也至故原州結贊坐於帳
中召與相見數讓國家因怒渾瑊曰武功之捷皆我之
力許以涇州靈州相報皆食其言負我深矣舉國所忿

本劫是盟在擒瑊也吾遣以金飾桎梏待瑊將獻贊普
旣以失之虛致君等耳當遣君輩三人歸也呂溫帶瘡
亦至結贊嘉其義厚給資之結贊率其衆於石門遣中
官俱文珍渾瑊之將馬寧馬燧之將馬弇歸于我遂送
漢衡叔矩等囚於河州辛榮扶餘準等於故廓州鄯州
分囚之結贊本請杜希全李觀同盟將執二節將率其
銳師來犯京師希全等旣不行又欲執渾瑊長驅入寇
其謀也如此上遣中官王子恒賫詔書以遺結贊蕃界
不納而還初瑊與駱元光將發涇州元光謂瑊曰本奉
詔令營於潘原堡以應援侍中竊以潘原去盟所六七

十里蕃情多詐侍中儻有急何由知之請次侍中爲營以虞其變城以非詔旨固止之元光與同進城之營西去盟所二十餘里元光之營次之其濠柵頗深固城之濠柵可踰越焉及城單騎奔歸未及其營守將李朝彩不能整衆多已奔散城至空營而已器械資糧悉棄之賴元光之衆陣於營中城旣入賊追騎方退元光乃先遣輜重次與城俱申其號令嚴其部伍而還城復鎮于奉天六月鹽夏二州吐蕃焚城門及廬舍毀城壁而歸七月詔曰乃者吐蕃犯塞毒我生靈俶擾隴東深入河曲朕以兵戈粗定傷夷未瘳務息戰伐之謀遂從通和

之請亦知戎醜志在貪婪重違修睦之辭乃允尋盟之會果爲隱匿變發墮宮縱犬羊兇狡之羣乘文武信誠之衆蒼黃淪陷深用惻然此皆由朕之不明致其至此旣無德於萬衆亦有愧於四方宵旰貽憂何嗟而及今兵部尚書崔漢衡等皆國之良士朝之蓋臣嬰繫窮廬眇然殊域念其家室或未周於屢空錄以息男庶或資於薄俸漢衡宜與一子七品官司勳員外郎鄭叔矩檢校戶部郎中路泌殿中侍御史韓弁及大將孟日華辛榮李至言范澄王良賁樂演明陽昔權交成等各與一子八品官試左金吾兵曹叅軍袁同直榆次尉裴頌及

副兵馬使已下各與一子九品官仍並與正員官餘將士各與一子官仍委本使卽具名銜聞奏於是遣決勝軍使唐良臣以衆六百人戍潘原堡神策副將蘇太平率其衆五百人戍隴州八月崔漢衡至自吐蕃初漢衡與同陷者並至河州尚結贊合召漢衡與神策將孟日華中官劉延邕俱至石門而遣之結贊合五十騎送至境上且賫表請進及潘原李觀使止曰有詔不許更納蕃使受其表而返其人自是吐蕃率羌渾之衆犯塞分屯於潘口及青石嶺先是吐蕃之衆自潘口東分爲三道其一趨隴州其一趨汧陽之東其一趨釣竿原是日相次屯於所趨之地連營數十里其汧陽賊營距鳳翔四十里京師震恐士庶奔駭賊遣羌渾之衆衣漢戎服僞稱邢君牙之衆奄至吳山及寶鷄北界焚燒廬舍驅掠人畜斷吳山神之首百姓丁壯者驅之以歸羸老者咸殺之或斷手鑿目棄之而去初李晟在鳳翔令伐大木塞安化峽及是賊竝焚之九月詔神策軍將石季章以衆三千戍武宮召唐良臣自潘原戍百里城是月吐蕃大掠汧陽吳山華亭等界人庶男女萬餘口悉送至安化峽西將分隸羌渾等乃曰從爾輩東向哭辭鄉國衆遂大哭其時一慟而絕者數百人投崖谷死傷者千

餘人聞者爲之痛心焉渾瑊遣其將任蒙主以衆三千
戍好畤是月吐蕃之衆復至分屯於豐義及華亭百寮
入計以破吐蕃圍隴州刺史韓清沔與蘇太平夜出兵
伏於大像龕及夜半令城中及龕各舉火相應賊大驚
因襲其營賊乃退散時吐蕃攻陷華亭初賊之圍華亭
也先絕其汲水道其守將王仙鶴及鎮兵百姓凡三千
人皆在圍中使人間道請救於隴州刺史韓清沔令蘇
太平率一千五百人赴之及中路其遊騎百餘沒於賊
太平素懦弱寡謀遽引衆退歸賊自是每日令遊騎十
餘至隴州州兵不敢復出凡四日圍中絕水援軍不至

賊又積柴城下將焚之仙鶴遂降於賊賊竝焚廬舍毀
城壁虜士衆十三四收丁壯棄老而去北攻連雲堡又
陷堡之三面頗峭峻唯北面連原以濠爲固賊自其北
建拋樓七具擊堡中堡中唯一井投石俄而滿焉又飛
梁架濠而過苦攻之堡將張明遂與其衆男女千餘口
東向慟哭而降涇州之西唯有連雲堡每偵候賊之進
退及是堡陷涇州不敢啓西門西門外皆爲賊境樵蘇
殆絕收刈禾稼必布陣於野而收獲之穫旣失時所得
多空穗於是涇人有飢憂焉吐蕃驅掠連雲堡之衆及
邠涇編戶逃竄山谷者并牛畜萬計悉其衆送至彈箏

峽自是涇隴邠等賊之所至俘掠殆盡是秋數州人無積聚者邊將唯遣使表賀賊退而已一月吐蕃數千騎復至長武城韓全義率衆禦之韓遊瓌之將請以衆助之遊瓌不許及暮賊退全義亦引還自是賊之騎常往來涇邠之間諸城西門莫敢啓者賊又修故原州城其大衆屯焉四年五月吐蕃三萬餘騎犯塞分入涇邠寧慶麟等州焚彭原縣解舍所至燒廬舍人畜沒者約二三萬計凡二旬方退陳許行營將韓全義自長武城率衆抗之無功而還遊瓌素無軍政且疾不能興閉城自守莫敢禦也先是吐蕃入寇恒以秋冬及春則多遇疾疫而退是來也方盛暑而無患蓋華人陷者厚其資產質其妻子爲戎虜所將而侵軼焉九月吐蕃將尚悉董星論莽羅等寇寧州節度使張獻甫率衆禦之斬首百餘級賊轉寇麟坊等州縱掠而去五年十月劔南節度使韋臯遣將王有道等與東蠻兩林苴那時勿鄧夢衝等帥兵於故雋州臺登北谷大破吐蕃青海獵城二節度殺其大兵馬使乞臧遮遮悉多楊朱斬首二千餘級其投崖谷赴水死者不可勝數生擒籠官四十五人收獲器械一萬餘事馬牛羊一萬餘頭匹遮遮者吐蕃驍勇者也或云尚結贊之子頗爲邊患自其死也官軍所

攻城柵無一降下蕃衆日却數年間盡復雋州之境六年吐蕃陷我北庭都護府初北庭安西旣假道於迴紇朝奏因附庸焉蕃性貪狠徵求無度北庭近羌凡服用食物所資必強取之人不聊生矣又有沙陀部六千餘帳與北庭相依亦屬於迴紇迴紇肆其抄奪尤所厭苦其葛祿部及白服突厥素與迴紇通和亦憾其奪掠因吐蕃厚賂見誘遂附之於是吐蕃率葛祿白服之衆去歲各來寇北庭迴紇大相頡干迦斯率衆援之頻戰敗績吐蕃攻圍頗急北庭之人旣苦迴紇是歲乃舉城降於吐蕃沙陀部落亦降焉北庭節度使楊襲古與麾下

二千餘人出奔西州頡干迦斯不利而還七年秋又悉其丁壯五六萬人將復北庭仍召襲古偕行俄爲吐蕃葛祿等所擊大敗死者大半頡干迦斯給之曰且與我同至牙帳當送君歸本朝也襲古從之及牙帳留而不遣竟殺之自是安西阻絕莫知存否唯西州之人猶固守焉頡干迦斯旣敗衄葛祿之衆乘勝取迴紇之浮圖川迴紇震恐悉遷西州部落羊馬於牙帳之南以避之八年四月吐蕃寇靈州掠人畜攻陷水口城進圍州城塞水口及支渠以營田詔河東振武分兵爲援又分神策六軍之卒三千餘人戍於定遠懷遠二城上御神武

樓勞遣之吐蕃引去六月吐蕃數千騎由青石嶺寇涇州掠田軍千餘人還及連雲堡守捉使唐朝臣遣兵出戰大將王進用死之九月西川節度使韋臯攻吐蕃之維州獲大將論贊熱及首領獻于京師十一月山南西道節度嚴震擊破吐蕃於芳州及黑水堡焚其積聚并獻首虜九年二月詔城鹽州是州先為吐蕃所毀自此塞外無堡障靈武勢隔西逼邠坊甚為邊患故命城之二旬而畢又詔兼御史大夫紇干遂統兵五千與兼御史中丞杜彥光之眾戍之是役也上念將士之勞厚令度支供給又詔涇原湖南山南諸軍深討吐蕃以分其

力由是板築之際虜無犯塞者及畢中外咸稱賀焉是月西川韋臯獻獲吐蕃首虜器械旗幟牛馬於闕下初將城鹽州上命臯出師以分吐蕃之兵臯遣大將董勔張芬出西山及南道破俄和城通鶴軍吐蕃南道元帥論莽熱率眾來援又破之殺傷數千人焚定廉故城凡平柵堡五十餘所十年南詔蠻蒙異牟尋大破吐蕃於神川使來獻捷語在南詔傳十三年八月黃少卿攻陷欽橫潯貴四州吐蕃渠帥論乞髡蕩沒藏悉諾律以其家屬來降明年竝以為歸德將軍十二年九月吐蕃寇慶州及華池縣殺傷頗甚十三年正月邢君牙奏請於

隴州西七十里築城以備西戎名永信城吐蕃贊普遣使農桑昔賚表請修和好邊將以聞上以其豺狼之性數負恩背約不受表狀任其使却歸五月十七日吐蕃於劔山馬嶺三處開路分軍下營僅經一月進軍逼臺登城雋州刺史曹高任率領諸軍將士并東蠻子弟合勢接戰自朝至午大破之生擒大籠官七人陣上殺獲三百人餘被刀箭者不可勝紀收獲馬畜五百餘頭匹器械二千餘事十四年十月夏州節度使韓全義破吐蕃於鹽州西北十六年六月鹽州破吐蕃於烏蘭橋下十七年七月吐蕃寇鹽州又陷麟州殺刺史郭鋒毀城

隍大掠居人驅党項部落而去次鹽州西九十里橫槽烽頓軍呼延州僧延素輩七人稱徐舍人召其火隊吐蕃沒勒遽引延素等疾趨至帳前皆馬革桔手毛繩縲頸見一吐蕃年少身長六尺餘赤髭大目乃徐舍人也命解縛坐帳中曰師勿懼余本漢人司空英國公五代孫也屬武后斲喪王室高祖建義中泯子孫流播絕域今三代矣雖代居職位世掌兵要思本之心無涯顧血族無由自拔耳此蕃漢交境也復九十里至安樂州師無由歸東矣延素曰僧身孤親老懇祈全活悲不自勝又曰余奉命率師備邊因求資食遂涉漢疆展轉東進

至麟州城既無備援兵又絕是以拔之知郭使君是勲
臣子孫必將活之不幸爲亂兵所害適有飛鳥使至飛
鳥猶中國驛騎也云術者上變召軍丞還遂歸之時詔
韋臯分遣偏將勒步騎合二萬出成都西山南北九道
竝進逼棲雞老翁故維州保州松州諸城以紓北邊故
也九月韋臯大破吐蕃於維州十八年正月韋臯擒吐
蕃大首領論莽熱來獻賜崇仁里宅以居之莽熱吐蕃
內大相也先貞元十六年韋臯累破吐蕃二萬餘衆於
黎州鶴州吐蕃遂大搜閱築壘造舟潛謀寇邊臯悉挫
之於是吐蕃酋師兼監統曩貢臘城等九節度嬰籠官

馬定德與其大將八十七人舉部落來降定德有計畫
習知兵法及山川地形吐蕃每用兵定德常乘驛計議
諸將稟其成算至是自以邊功不立懼得罪而歸心焉
其明年吐蕃昆明城管磨些蠻千餘戶又來降吐蕃以
其衆外潰遂北寇靈朔陷麟州詔韋臯出兵成都西山
以紓北邊臯遂命鎮靜軍兵馬使陳泊等統兵萬人出
三竒路威戎軍使崔堯臣率兵一千出龍溪石門路南
維保二州兵馬使仇冕保霸兩州刺史董振等率兵二
千進逼吐蕃維州城中北路兵馬使邢玘并諸州刺史
董懷愕等率兵四千進攻棲雞老翁等城都將高倜王

英俊等率兵二千進逼故松州隴東路兵馬使元膺并諸將郝宗等復分兵八千出南道雅邛黎嵩等路又令邛州鎮南軍使御史大夫韋良金發鎮兵一千三百續進雅州經畧使路惟明與三部落主趙日進等率兵三千進攻逋租偏松等城黎州經畧使王有道率三部落郝金信等二千過大渡河深入吐蕃界嵩州經畧使陳孝陽與行營兵馬使何大海韋義等及磨些蠻三部落主苴那時率兵四千進攻昆明諾濟城自八月至于十二月累破十六萬衆拔其七城五軍鎮受降二千餘戶生擒六千餘人斬首一萬餘級遂圍維州救軍再至轉

戰千餘里吐蕃連敗靈朔之寇引衆南下於是贊普遣莽熱以內大相兼東境五道節度兵馬使都統羣牧大使率雜虜十萬衆來解維州之圍王師萬餘衆據險設伏以待之先以千人挑戰莽熱見我師之少也悉衆來追入于伏中諸將四面疾擊遂擒莽熱虜衆大潰十九年五月吐蕃使論頰熱至六月以右龍武大將軍薛伾兼御史大夫使于吐蕃二十年三月上旬贊普卒廢朝三日命工部侍郎張薦弔祭之贊普以貞元十三年四月卒長子立一歲卒次子嗣立命文武三品已上官弔其使四月吐蕃使臧河南觀察使論乞冉及僧南撥特

計波等五十四人來朝十二月遣使論襲執郭志崇來朝二十一年二月順宗命左金吾衛將軍兼御史中丞田景度持節告哀于吐蕃以庫部員外郎兼御史中丞熊執易爲副使七月吐蕃使論悉諾等來朝永貞元年十月贊普使論乞縷勃藏來貢助德宗山陵金銀衣服牛馬等十一月以衛尉少卿兼御史中丞侯幼平充入蕃告冊立等使元和元年正月福建道送到吐蕃生口十七人詔給遞乘放還蕃六月遣使論勃藏來朝五年五月遣使論思耶熱來朝并歸鄭叔矩路泌之柩及叔矩男文延等一十三人叔矩泌平涼之盟陷焉凡二十

餘年竟不屈節因沒於蕃中至是請和故歸之六月命宰相杜佑等與吐蕃使議事中書令廳且言歸我秦原安樂州地七月遣鴻臚少卿攝御史中丞李銘爲入蕃使丹王府長史兼侍御史吳暈副之六年至十年遣使朝貢不絕十二年四月吐蕃以贊普卒來告以右衛將軍烏重玘兼御史中丞充弔祭使殿中侍御史段鈞副之十三年十月吐蕃圍我省州鳳翔上言遣使修好是月靈武於定遠城破吐蕃二萬人殺戮二千人生擒節度副使一人判官長行三十九人獲羊馬甚衆平涼鎮遏使郝玘破二萬餘衆收復原州城獲羊馬不知其數

夏州節度田縉於靈武亦破三千餘人十一月鹽州上言吐蕃入河曲夏州破五萬餘人靈武破長樂州羅城焚其屋宇器械西川節度使王播攻拔峨和棲雞等城十四年正月勅曰朕臨御萬邦推布誠信西戎納款積有歲時中或虧違亦嘗苞貸我有殊德寧不是思重譯貢珍道途相繼申恩示禮曾無闕焉昨者蕃使奉章又至京輦將君長之命陳和好之誠臨軒召見館餼加厚復以信幣諭之簡書亦旣言旋纔及近甸遽聞蟻聚來犯封陞河曲之間頗爲暴擾背惠棄約斯謂無名公議物情咸請誅絕朕深惟德化之未被豈慮夷俗之不賓

其國失信其使何罪釋其維繫以遂性示之弘覆以忘懷予衷苟孚庶使知感其蕃使論矩立藏等并後般來使并宜放歸本國仍委鳳翔節度使以此意曉諭八月吐蕃營於慶州方渠大軍至河州界十月吐蕃節度論三摩及宰相尚塔藏中書令尚綺心兒共領軍約十五萬衆圍我鹽州數重党項首領亦發兵驅羊馬以助閱歷三旬賊以飛梯鵝車木驢等四面齊攻城欲陷者數四刺史李文悅率兵士乘城力戰城穿壞不可守撤屋版以禦之晝夜防拒或潛兵斫營開城出戰約殺賊萬餘衆諸道救兵無至者凡二十七日賊乃退十五年二

月以秘書少監兼御史中丞田洎入吐蕃告哀并告冊立三月攻掠我青塞堡七月遣使來弔祭十月侵逼涇州命右軍中尉梁守謙充左右神策京西京北行營都監統神策兵四千人并發八鎮全軍往救援以太府少卿兼御史中丞邵同持節入吐蕃充答請和好使貶前入吐蕃使秘書少監田洎柳州司戶初洎入蕃爲弔祭使蕃請於長武城下會盟洎懦怯恐不得還唯唯而已至是西戎入寇且曰田洎許我統兵馬赴盟誓遂貶之戎人實以邊將擾之致忿徒假洎爲辭也涇州上言吐蕃大將竝退於是罷神策行營兵自田縉統夏州以貪

狠侵擾党項苦之屢引西戎犯塞及是大兵入寇邊將郝玘數襲擊蕃壘殺戮甚衆邠州李光顏復以全師而至戎人懼而退蓋田縉始生國患而賴光顏郝玘之驅戮也十一月夏州節度使李佑自領兵赴長澤鎮靈武節度使李聽自領兵赴長樂州竝奉詔討吐蕃也十二月吐蕃千餘人圍烏白池長慶元年六月犯青塞堡以我與迴紇和親故也鹽州刺史李文悅發兵進擊之九月吐蕃遣使請盟上許之宰相欲重其事請告太廟太常禮院奏曰謹按肅宗代宗故事與吐蕃會盟竝不告廟唯德宗建中末與吐蕃會盟於延平門欲重其誠信

特令告廟至貞元三年會於平涼亦無告廟之文伏以
事出一時又非經制求之典禮亦無其文今謹參詳恐
不合告從之乃命大理卿兼御史大夫劉元鼎充西蕃
盟會使以兵部郎中兼御史中丞劉師老爲副尚舍奉
御兼監察御史李武京兆府奉先縣丞兼監察御史李
公度爲判官十月十日與吐蕃使盟宰臣及右僕射六
曹尚書中執法太常司農卿京兆尹金吾大將軍皆預
焉其詞曰維唐承天撫有八紘聲教所臻靡不來廷兢
業齊栗懼其隕顛續武紹文疊慶重光克彰濬哲罔忝
洪緒十有二葉二百有四載則我太祖權明號而建不

拔鋪鴻名而垂永久類上帝以答嘉應亨皇靈以酬景

福曷有怠已越歲在癸丑冬十月癸酉文武孝德皇帝

詔丞相臣植臣播臣元穎等與大將和蕃使禮部尚書

訥羅論等會盟于京師壇于城之西郊坎于壇北凡讀

誓刑牲加書復壤陟降周旋之禮動無違者蓋所以偃

兵息人崇姻繼好懋建遠畧規恢長利故也原夫昊穹

上臨黃祗下載茫茫蠢蠢之類必資官司爲厥宰臣苟

無統紀則相滅絕中夏見管維唐是君西裔一方大蕃

爲主自今而後屏去兵革宿忿舊惡廓焉消除追崇舅

甥曩昔結援邊埃撤警戍烽韜煙患難相恤暴掠不作

亭障旣脫絕其交侵襟帶要害謹守如故彼無此詐此無彼虞嗚呼愛人爲仁保境爲信畏天爲智事神爲禮有一不至搆災于躬塞山崇崇河水湯湯日吉辰良奠其兩疆西爲大蕃東實巨唐大臣執簡播告秋方大蕃贊普及宰相鉢闡布尚綺心兒等先寄盟文要節云蕃漢二邦各守見管本界彼此不得征不得討不得相爲寇讐不得侵謀境土若有所疑或要捉生問事便給衣糧放還今竝依從更無添改預盟之官十七人皆列名焉其劉元鼎等與論訥羅同赴吐蕃本國就盟仍勅元鼎到彼令宰相已下各於盟文後自書名靈武節度使

李進誠於太谷山下破吐蕃三千騎二年二月遣使來請定界六月復遣使來朝鹽州奏吐蕃千餘人入靈武界遣兵逐便邀截又言擒得與党項送書信吐蕃一百五十人是月劉元鼎自吐蕃使迴奏云去四月二十四日到吐蕃牙帳以五月六日會盟訖初元鼎往來蕃中竝路經河州見其都元帥尚書令尚綺心兒云迴紇小國也我以丙申年踰磧討逐去其城郭二日程計到卽破滅矣會我聞本國有喪而還迴紇之弱如此而唐國待之厚於我何哉元鼎云迴紇於國家有救難之勲而又不曾侵奪分寸土地豈得不厚乎是時元鼎往來渡

黃河上流在洪濟橋西南二千餘里其水極爲淺狹春可揭涉秋夏則以船渡其南三百餘里有三山山形如鍬河源在其間水甚清冷流經諸水色遂赤續爲諸水所注漸旣黃濁又其源西去蕃之列館約四驛每驛約二百餘里東北去莫賀延磧尾濶五十里向南漸狹小北自沙州之西乃南入吐渾國至此轉微故號磧尾計其地理當劔南之直西元鼎初見贊普於悶懼盧川蓋贊普夏衙之所其川在邏娑川南百里臧河之所流也時吐蕃遣使論悉諾息等隨元鼎來謝命太僕少卿杜載使以答之三年正月遣使論答熱來朝賀四年九月

遣使求五臺山圖十月貢羣牛及銀鑄成犀牛羊鹿各一寶曆元年二月遣使尚綺立熱來朝且請和好九月遣光祿卿李銳爲使以答之太和五年至八年遣使朝貢不絕我亦時遣使報之開成元年二年皆遣使來會昌二年贊普卒十二月遣論贊等來告哀詔以將作少監李璟弔祭之大中三年春宰相尚恐熱東道節度使以秦原安樂等三州并石門木峽等七關款塞涇原節度使康季榮以聞命太僕卿陸耽往勞焉其年七月河隴耆老率長幼千餘人赴闕上御延喜樓觀之莫不歡呼抃舞更相解辯爭冠帶于康衢然後命善地以處之

觀者咸稱萬歲

史臣曰戎狄之爲患也久矣自秦漢已還載籍大備可得而詳也但世罕小康君無常聖我衰則彼盛我盛則彼衰盛則侵我郊圻衰則服我聲教懷柔之道備預之方儒臣多議於和親武將唯期於戰勝此其大較也彼吐蕃者西陲開國積有歲年蠶食隣蕃以恢土宇高宗朝地方萬里與我抗衡近代已來莫之與盛至如式遏邊境命制出師一彼一此或勝或負可謂勞矣迨至幽陵盜起乘輿播遷戍卒咸歸河湟失守此又天假之也自茲密邇京邑時縱寇掠雖每遣行人來修舊好玉帛

纔至於上國烽燧已及於近郊背惠食言不顧禮義卽可知也夫要以神明貴其誠信平涼之會畜其詐謀此又不可以忠信而御也孔子曰夷狄之有君不如諸夏之亡也誠哉是言

贊曰西戎之地吐蕃是強蠶食隣國鷹揚漢疆乍叛乍服或弛或張禮義雖攝其心豺狼

舊唐書卷一百九十六下

舊唐書卷一百九十六下考證

吐蕃傳劔南節度使崔寧大破吐蕃故洪等四節度兼突厥吐渾互變羌党項等二十餘萬衆○互變當是

氏蠻之訛改正

陷水口城進圍州城塞水口及支渠以營田○臣西按

新書云陷水口塞營田渠語意較明若如此則似吐蕃自營田矣

濶五十里向南漸狹小北自沙州之西乃南入吐渾國


至北轉微○臣西按新書云磧廣五十里北自沙州

西南入吐谷渾變狹故號磧尾據此是磧自北而南

舊唐書卷一百九十六下考證

乃變狹小不當云至北轉微也北字當是此字之訛
今改正

舊唐書卷一百九十六下考證



舊唐書卷一百九十七

五代司空同中書門下平章事劉昫撰

列傳第一百四十七

南蠻 西南蠻

林邑 婆利

真臘 陀浪

墮和羅 墮婆登

西趙蠻 牂牁蠻

東女國 南詔蠻 驃國

林邑國漢日南象林之地在交州南千餘里其國延袤

乾隆四年校刊

舊唐書卷一百九十七

一

舊唐書卷之九十七 列傳

數千里北與驩州接地氣冬溫不識冰雪常多霧雨其王所居城立木為柵王著白氎古貝斜絡膊繞腰上加真珠金鎖以為瓔珞卷髮而戴花夫人服朝霞古貝以為短裙首戴金花身飾以金鎖真珠瓔珞王之侍衛有兵五千人能用弩及積以藤為甲以竹為弓乘象而戰王出則列象千頭馬四百匹分為前後其人拳髮色黑俗皆徒跣得麝香以塗身一日之中再塗再洗拜謁皆合掌頓顙嫁娶之法得取同姓俗有文字尤信佛法人多出家父母死子則剔髮而哭以棺盛屍積柴燔柩收其灰藏於金瓶送之水中俗以十二月為歲首稻歲再

熟自此以南草木冬榮四時皆食生菜以檳榔汁為酒有結遼鳥能解人語武德六年其王范梵志遣使來朝八年又遣使獻方物高祖為設九部樂以宴之及賜其王錦綵貞觀初遣使貢馴犀四年其王范頭黎遣使獻火珠大如鷄卵圓白皎潔光照數尺狀如水精正午向日以艾蒸之即火燃五年又獻五色鸚鵡太宗異之詔太子右庶子李百藥為之賦又獻白鸚鵡精識辯慧善於應答太宗憫之並付其使令放還於林藪自此朝貢不絕頭黎死子范鎮龍代立太宗崩詔於陵所刊石圖頭黎之形列於玄闕之前十九年鎮龍為其臣摩訶漫

乾隆四年校刊

舊唐書卷之九十七 列傳

七

多伽獨所殺其宗族竝誅夷范氏遂絕國人乃立頭黎
之女婿婆羅門爲王後大臣及國人感思舊主乃廢婆
羅門而立頭黎之嫡女爲王自林邑已南皆卷髮黑身
通號爲崑崙

婆利國在林邑東南海中洲上其地延袤數千里自交
州南渡海經林邑扶南赤土丹丹數國乃至焉其人皆
黑色穿耳附璫王姓刹利耶伽名護路那婆世有其位
王戴花形如皮弁裝以眞珠瓔珞身坐金牀侍女有金
花寶鏤之飾或持白拂孔雀扇行則駕象鳴金擊鼓吹
蠡爲樂男子皆拳髮被古貝布橫幅以繞腰風氣暑熱

恒如中國之盛夏穀一歲再熟有古貝草緝其花以作
布麗者名古貝細者名白氎貞觀四年其王遣使隨林
邑使獻方物

盤盤國在林邑西南海曲中北與林邑隔小海自交州
船行四十日乃至其國與狼牙修國爲隣皆學婆羅門
書甚敬佛法貞觀九年遣使來朝貢方物

眞臘國在林邑西北本扶南之屬國崑崙之類在京師
南二萬七百里北至愛州六十日行其王姓刹利氏有
大城三十餘所王都伊奢那城風俗被服與林邑同地
饒瘴癘毒海中大魚有時半出望之如山每五六月中

毒氣流行卽以牛豕祠之不者則五穀不登其俗東向開戶以東爲上有戰象五千頭尤好者飼以飯肉與隣國戰則象隊在前於背上以木作樓上有四人皆持弓箭國尚佛道及天神天神爲大佛道次之武德六年遣使貢方物貞觀二年又與林邑國俱來朝獻太宗嘉其陸海疲勞錫賚甚厚南方人謂真臘國爲吉蔑國自神龍已後真臘分爲二半以南近海多陂澤處謂之水真臘半以北多山阜謂之陸真臘亦謂之文單國高宗則天玄宗朝並遣使朝貢水真臘國其境東西南北約員八百里東至奔陀浪州西至墮羅鉢底國南至小海北卽陸真臘其王所居城號婆羅提拔國之東界有小城皆謂之國其國多象元和八年遣李摩那等來朝

隋洄國在林邑西南大海中東南與墮和羅接去交阯三月餘日行賓服於墮和羅其王姓察失利字婆末婆那土無蠶桑以白氎朝霞布爲衣俗皆樓居謂之干欄貞觀十八年遣使來朝二十一年又遣使獻白鸚鵡及婆律膏仍請馬及銅鍾詔並給之

訶陵國在南方海中洲上居東與婆利西與墮婆登北與真臘接南臨大海豎木爲城作大屋重閣以椶櫚皮覆之王坐其中悉用象牙爲牀食不用匙筯以手而撮

亦有文字頗識星曆俗以椰樹花爲酒其樹生花長三尺餘大如人膊割之取汁以成酒味甘飲之亦醉貞觀十四年遣使來朝大曆三年四月皆遣使朝貢元和十年遣使獻僧祇僮五人鸚鵡頻伽烏并異種名寶以其使李訶內爲果毅訶內請廻授其弟詔褒而從之十三年遣使進僧祇女二人鸚鵡玳瑁及生犀等

墮和羅國南與盤盤北與迦羅舍佛東與真臘接西隣大海去廣州五月日行貞觀十二年其王遣使貢方物二十三年又遣使獻象牙火珠請賜好馬詔許之

墮婆登國在林邑南海行二月東與訶陵西與迷黎車

接北界大海風俗與訶陵略同其國種稻每月一熟亦有文字書之於貝多葉其死者口實以金又以金釧貫於四支然後加以婆律膏及龍腦等香積薪以燔之貞觀二十一年其王遣使獻古貝象牙白檀太宗璽書報之并賜以雜物

東謝蠻其地在黔州之西數百里南接守宮獠西連夷子北至蠻土宜五穀不以牛耕但爲畚田每歲易俗無文字刻木爲契散在山洞間依樹爲層巢而居汲流以飲皆自營生業無賦稅之事謁見貴人皆執鞭而拜有功勞者以牛馬銅鼓賞之有犯罪者小事杖罰之大事

殺之盜物倍還其贓婚姻之禮以牛酒爲聘女歸夫家皆母自送之女夫慙逃避經旬乃出讌聚則擊銅鼓吹大角歌舞以爲樂好帶刀劍未嘗捨離丈夫衣服有衫襖大口袴以綿紬及布爲之右肩上斜束皮帶裝以螺殼虎豹猿狖及犬羊之皮以爲外飾坐皆蹲踞男女椎髻以緋束之後垂向下其首領謝元深旣世爲酋長其部落皆尊畏之謝氏一族法不育女自云高姓不可下嫁故也貞觀三年元深入朝冠烏熊皮冠若今之髦頭以金銀絡額身披毛帔爲皮行滕而著履中書侍郎顏師古奏言昔周武王時天下太平遠國歸款周史乃書

其事爲王會篇今萬國來朝至於此輩章服實可圖寫今請撰爲王會圖從之以其地爲應州仍拜元深爲刺史領黔州都督府又有南謝首領謝強與西謝隣共元深俱來朝見爲南壽州刺史後改爲莊州貞元十三年正月西南蕃大酋長正議大夫檢校蠻州長史繼襲蠻州刺史資陽郡開國公賜紫金魚袋宋鼎左右大首領朝散大夫前檢校邛州刺史賜紫金魚袋謝汕左右大首領繼襲攝蠻州巴江縣令賜紫金魚袋宋萬傳界首子弟大首領朝散大夫牂州錄事參軍謝文經黔中經畧招討觀察使王礎奏前件刺史建中三年一度朝貢

自後更不許隨例入朝今年懇訴稱州接牂牁同被聲
教獨此排擯竊自慙耻謹遣隨牂牁等朝賀伏乞特賜
優諭兼同牂牁刺史授官其牂牁兩州戶口殷盛人力
强大隣側諸蕃悉皆敬憚請比兩州每年一度朝貢仍
依牂牁輪環差定并以才幹位望爲衆推者充勅旨曰
宋鼎等已改官訖餘依舊

西趙蠻在東謝之南其界東至夷子西至昆明南至西
洱河山洞阻深莫知道里南北十八日行東西二十三
日行其風俗物產與東謝同首領趙氏世爲酋長有戶
萬餘貞觀三年遣使入朝二十一年以其地置明州以
首領趙磨爲刺史

牂牁蠻首領亦姓謝氏其地北去兖州一百五十里東
至辰州二千四百里南至交州一千五百里西至昆明
九百里無城壁散爲部落而居土氣鬱熱多霖雨稻粟
再熟無徭役唯征戰之時乃相屯聚刻木爲契其法劫
盜者二倍還贓殺人者出牛馬三十頭乃得贖死以納
死家風俗物產畧與東謝同其首領謝龍羽大業末據
其地勝兵數萬人武德三年遣使朝貢授龍羽牂州刺
史封夜郎郡公貞觀四年十二月遣使朝貢開元十年
閏五月大酋長謝元齊死詔立其嫡孫嘉藝襲其官封

二十五王大酋長趙君道來朝且獻方物大曆中貞元初數遣使朝貢七年二月授其酋長趙主俗官以其歲初朝貢不絕褒之也自七年至十八年凡五遣使來元和三年五月勅自今已後委黔南觀察使差本道軍將充押領牂牁昆明等使四年正月遣使來朝是月遣中使魏德和領其使并賫國信物降璽書賜其王焉七年九年十一年凡三遣使來其年十二月又遣使來賀正長慶中亦朝貢不絕寶曆元年十二月遣使謝良震來朝大和五年至會昌二年凡七遣使來

南平獠者東與智州南與渝州西與涪州接部落四千

餘戶土氣多瘴癘山有毒草及沙虱蝮蛇人並樓居登梯而上號爲干欄男子左衽露髮徒跣婦人橫布兩幅穿中而貫其首名爲通裙其人美髮爲髻鬢垂於後以竹筒如筆長三四寸斜貫其耳貴者亦有珠璫土多女少男爲婚之法女氏必先貨求男族貧人無以嫁女多賣與婦人爲婢俗皆婦人執役其王姓朱氏號爲劔荔王遣使內附以其地隸于渝州

東女國西羌之別種以西海中復有女國故稱東女焉俗以女爲王東與茂州党項接東南與雅州接界隔羅女蠻及白狼夷其境東西九日行南北二十日行有大

小八十餘城其王所居名康延川中有弱水南流用牛皮爲船以渡戶四萬餘衆勝兵萬餘人散在山谷間女王號爲賓就有女官曰高霸平議國事在外官僚並男夫爲之其王侍女數百人五日一聽政女王若死國中多斂金錢動至數萬更於王族求令女二人而立之大者爲王其次爲小王若大王死卽小王嗣立或姑死而婦繼無有篡奪其所居皆起重屋王至九層國人至六層其王服青毛綾裙下領衫上披青袍其袖委地冬則羔裘飾以紋錦爲小鬟髻飾之以金耳垂璫足履鞢鞞俗重婦人而輕丈夫文字同於天竺以十一月爲正其

俗每至十月令巫者齋楮詣山中散糟麥於空大咒呼鳥俄而有鳥如鷄飛入巫者之懷因剖腹而視之每有一穀來歲必登若有霜雪必多災異其俗信之名爲鳥卜其居喪服飾不改爲父母則三年不櫛沐貴人死者或剝其皮而藏之內骨於瓶中糝以金屑而埋之國王將葬其大臣親屬殉死者數十人隋大業中蜀王秀遣使招之拒而不受武德中女王湯滂氏始遣使貢方物高祖厚資而遣之還至隴右會突厥入寇被掠於虜庭及頡利平其使復來入朝太宗送令反國并降璽書慰撫之垂拱二年其王斂臂遣大臣湯劒左來朝仍請官

號則天冊拜斂臂爲左玉鈴衛員外將軍仍以瑞錦製蕃服以賜之天授三年其王俄琰兒來朝萬歲通天元年遣使來朝開元二十九年十二月其王趙曳夫遣子獻方物天寶元年命有司宴於曲江令宰臣已下同宴又封曳夫爲歸昌王授左金吾衛大將軍賜其子帛八十匹放還後復以男子爲王貞元九年七月其王湯立悉與哥隣國王董卧庭白狗國王羅施忽逋租國王弟鄧吉知南水國王姪薛尚悉曩弱水國王董辟和悉董國王湯息贊清遠國王蘇唐磨咄霸國王董藐蓬各率其種落詣劔南西川內附其哥隣國等皆散居山川弱

水王卽國初女國之弱水部落其悉董國在弱水西故亦謂之弱水西悉董王舊皆分隸邊郡祖父例授將軍中郎果毅等官自中原多故皆爲吐蕃所役屬其部落大者不過三二千戶各置縣令十數人理之土有絲絮歲輸於吐蕃至是悉與之同盟相率獻欵兼齎天寶中國家所賜官誥共三十九通以進西川節度使韋臯處其衆於維霸保等州給以種糧耕牛咸樂生業立悉等數國王自來朝召見於麟德殿授立悉銀青光祿大夫歸化州刺史鄧吉知試太府少卿兼丹州長史薛尚悉曩試少府少監兼霸州長史董卧庭行至綿州卒贈武

德州刺史命其子利囉爲寶寧都督府長史襲哥隣王立悉妹乞悉漫頗有才智從其兄來朝封和義郡夫人其大首領董卧卿等皆授以官俄又授女國王兄湯厥銀青光祿大夫試太府卿清遠王弟蘇歷顛銀青光祿大夫試衛尉卿南國王薛莫庭及湯息贊董藐蓬女國唱後湯佛庭美玉鉢南郎唐並授銀青光祿大夫試太僕卿其年西山松州生羌等二萬餘戶相繼內附其黏信部落主董夢葱龍諾部落主董辟忽皆授試衛尉卿立悉等並赴明年元會訖錫以金帛各遣還尋詔加韋臯統押近界羌蠻及西山八國使其部落代襲刺史等

官然亦潛通吐蕃故謂之兩面羌

南詔蠻本烏蠻之別種也姓蒙氏蠻謂王爲詔自言哀牢之後代居蒙舍州爲渠帥在漢永昌故郡東姚州之西其先渠帥有六自號六詔兵力相埒各有君長無統帥蜀時爲諸葛亮所征皆臣服之國初有蒙舍龍生迦獨龐迦獨生細奴邏高宗時來朝細奴邏生邏盛武后時來朝其妻方娠邏盛次姚州聞妻生子曰吾且有子死於唐地足矣子名曰盛邏皮邏盛至京師賜錦袍金帶歸國開元初邏盛死子盛邏皮立盛邏皮死子皮邏閣立二十六年詔授特進封越國公賜名曰歸義其後

破洱河蠻以功策授雲南王歸義漸強盛餘五詔浸弱
先是劔南節度使王昱受歸義賂奏六詔合爲一詔歸
義旣併五詔服羣蠻破吐蕃之衆兵日以驕大每入覲
朝廷亦加禮異二十七年徙居大和城天寶四載歸義
遣孫鳳迦異來朝授鴻臚卿歸國恩賜甚厚歸義意望
亦高時劔南節度使章仇兼瓊遣使至雲南與歸義言
語不相得歸義常啣之七年歸義卒詔立子閣羅鳳襲
雲南王無何鮮于仲通爲劔南節度使張虔陀爲雲南
太守仲通褊急寡謀虔陀矯詐待之不以禮舊事南詔
常與其妻子謁見都督虔陀皆私之有所徵求閣羅鳳

多不應虔陀遣人罵辱之仍密奏其罪惡閣羅鳳忿怨
因發兵反攻圍虔陀殺之時天寶九年也明年仲通率
兵出戎雋州閣羅鳳遣使謝罪仍與雲南錄事叅軍姜
如芝俱來請還其所虜掠且言吐蕃大兵壓境若不許
當歸命吐蕃雲南之地非唐所有也仲通不許囚其使
進軍逼大和城爲南詔所敗自是閣羅鳳北臣吐蕃吐
蕃令閣羅鳳爲贊普鍾號曰東帝給以金印蠻謂弟爲
鍾時天寶十一年也十二年劔南節度使楊國忠執國
政仍奏徵天下兵俾留後侍御史李宓將十餘萬輦餉
者在外涉海瘴死者相屬於路天下始騷然苦之宓復

敗於大和城北死者十八九會安祿山反閣羅鳳乘釁
攻陷雋州及會同軍西復降尋傳蠻大曆十四年閣羅
鳳子鳳迦異先閣羅鳳死立迦異子是爲異牟尋頗知
書有才智善撫其衆吐蕃役賦南蠻重數又奪諸蠻險
地立城堡歲徵兵以助鎮防牟尋益厭苦之有鄭回者
本相州人天寶中舉明經授雋州西瀘縣令雋州陷爲
所虜閣羅鳳以回有儒學更名曰蠻利甚愛重之命教
鳳迦異及異牟尋立又令教其子尋夢湊回久爲蠻師
凡授學雖牟尋夢湊回得箠故牟尋以下皆嚴憚之
蠻謂相爲清平官凡置六人牟尋以回爲清平官事皆

咨之秉政用事餘清平官五人事回卑謹或有過回輒
撻之回嘗言於牟尋曰自昔南詔嘗欵附中國中國尚
禮義以惠養爲務無所求取今棄蕃歸唐無遠戍之勞
重稅之困利莫大焉牟尋善其言謀內附者十餘年矣
會劍南西川節度使韋臯招撫諸蠻苴烏星虜望等歸
化微聞牟尋之意因令蠻寓書於牟尋且招懷之時貞
元四年也七年又遣間使持書喻之道出磨些蠻其魁
主潛告吐蕃使至雲南吐蕃已知之令詰牟尋牟尋懼
因給吐蕃曰唐使本蠻也韋臯許其求歸無他謀遂執
送吐蕃吐蕃益疑之多召南詔大臣之子爲質牟尋愈

怨九年四月牟尋乃與酋長定計遣使趙莫羅眉由兩川楊大和堅由黔中或由安南使凡三輩致書於韋臯各賫生金丹砂爲贄三分前臯所與牟尋書各持其一爲信歲中三使皆至京師且曰牟尋請歸大國永爲藩國所獻生金以喻向北之意如金也丹砂示其赤心耳上嘉之乃賜牟尋詔書因命韋臯遣使以觀其情臯遂命巡官崔佐時至牟尋所都陽苴咩城南去太和城十餘里東北至成都二千四百里東至安南如至成都通水陸行是時也吐蕃使數百人先佐時在南詔牟尋悉召諸種落與議歸化或未畢至未敢公言密令佐時稱

牂牁使衣以牂牁服而入佐時不肯曰我大唐使安得服小夷之服牟尋不得已乃夜迎佐時設位陳燈燭佐時乃大宣詔書牟尋恐吐蕃知顧左右無色而業已歸唐久矣獻欷流涕皆俯伏受命其明年正月異牟尋使其子閣勸及清平官等與佐時盟於黔蒼山神祠盟書一藏於神室一沉於西洱河一置祖廟一以進天子閣勸卽尋夢湊也鄭回見佐時多所指導故佐時探得其情乃請牟尋斬吐蕃使數人以示歸唐又得其吐蕃所與金印牟尋遣佐時歸仍刻金契以獻閣勸賦詩以餞之牟尋乃去吐蕃所立帝號私於佐時請復南詔舊

名佐時與盟訖留二旬有六日而歸初吐蕃因爭北庭與迴鶻大戰死傷頗衆乃徵兵於牟尋須萬人牟尋既定計歸我欲因徵兵以襲之乃示寡弱謂吐蕃曰蠻軍素少僅可發三千人吐蕃少之請益至五千乃許牟尋遽遣兵五千人戍吐蕃乃自將數萬踵其後晝夜兼行乘其無備大破吐蕃於神川遂斷鐵橋遣使告捷且請韋臯使閱其所虜獲及城堡以取信焉時韋臯上言牟尋收鐵橋已來城壘一十六擒其王五人降其衆十餘萬以祠部郎中兼御史中丞袁滋持節冊南詔仍賜牟尋印鑄用黃金以銀爲窠文曰貞元冊南詔印先是韋

臯奏南詔前遣清平官尹仇寬獻所受吐蕃印五二用黃金今賜請以黃金從蠻夷所重傳示無窮從臯之請也十年八月遣使蒙湊羅棟及尹仇寬來獻鐸槃浪人劍及吐蕃印八紐湊羅棟牟尋之弟也錫賚甚厚以尹仇寬爲檢校左散騎常侍餘各授官有差俄又封尹仇寬爲高溪郡王十一年三月遣清平官尹輔酋隨袁滋來朝又得先沒蕃將衛景昇韓演等并南詔所獲吐蕃將帥俘馘百人至京師湊羅棟歸國在道而卒贈右散騎常侍授尹輔酋檢校太子詹事兼御史中丞餘亦差次授官又降勅書賜異牟尋及子閣勸清平官鄭回尹

仇寬等各一書書左列中書三官宣奉行復舊制也九月異牟尋遣使獻馬六十四匹十二年韋臯於雅州會野路招收得投降蠻首領高萬唐等六十九人戶約七千兼萬唐等先受吐蕃金字告身五十片十四年異牟尋遣酋望大將軍王丘各等賀正兼獻方物十九年正月旦上御含元殿受南詔朝賀以其使楊鏌龍武爲試太僕少卿授黎州廓清道蠻首領襲恭化郡王劉志寧試太常卿二十年南詔遣使朝貢元和二年八月遣使鄧儂傳來朝授試殿中監三年十二月以異牟尋卒廢朝三日四年正月以太常少卿武少儀充弔祭使仍冊牟

尋之子驃信苴蒙閣勸爲南詔仍命鑄元和冊南詔印七年十月皆遣使朝貢十一年五月以龍蒙盛卒廢朝三日遣使來請冊立其君長以少府少監李銑充冊立弔祭使左贊善大夫許堯佐副之十二年至十五年比年遣使來朝或年內二三至者寶曆二年大和元年亦遣使來三年杜元穎鎮西川以文儒自高不練戎事南蠻乘我無備大舉諸部入寇牧守屢陳亦不之信十一月蜀川出軍與戰不利陷我邛州逼成都府入梓州西郭驅劫玉帛子女而去上聞之大怒再貶元穎爲循州司馬明年正月其王蒙嵯顛以表自陳請罪兼疏元穎

過失國家方事柔遠尋釋其罪復遣使來朝五年八年亦遣使來貢方物開成四年五年會昌二年皆遣使來朝


驃國在永昌故郡南二千餘里去上都一萬四千里其國境東西三千里南北三千五百里東隣真臘國西接東天竺國南盡滇海北通南詔些樂城界東北拒陽苴咩城六千八百里往來通聘迎羅婆提等二十國役屬者道林王等九城食境土者羅君潛等二百九十部落其王姓困没長名摩羅惹其國相名摩訶思那其王近適則昇以金繩牀遠適則乘象嬪姝甚衆常數百人其

羅城構以磚甃周一百六十里壕岸亦構塼相傳本是舍利佛城城內有居人數萬家佛寺百餘區其堂宇皆錯以金銀塗以丹彩地以紫鑛覆以錦罽其俗好生惡殺其土宜菽粟稻梁無麻麥其理無刑名桎梏之具犯罪者以竹五十本束之復犯者撻其背數止五輕者止三殺人者戮之男女七歲則落髮止寺舍依桑門至二十不悟佛理乃復長髮爲居人其衣服悉以白氎爲朝霞繞腰而已不衣繒帛云出於蠶爲其傷生故也君臣父子長幼有序華言謂之驃自謂突羅成閻婆人謂之徒里掘古未嘗通中國貞元中其王聞南詔異牟尋歸

附心慕之八年乃遣其弟悉利移因南詔重譯來朝又獻其國樂凡十曲與樂工三十五人俱樂曲皆演釋氏經論之詞意尋以悉利移爲試太僕卿

史臣曰禹畫九州周分六服斷長補短止方七千國賦之所均王教之所備此謂華夏者也以圓蓋方輿之廣廣谷大川之多民生其間胡可勝道此謂蕃國者也西南之蠻夷不少矣雖言語不通嗜欲不同亦能候律瞻風遠修職貢但患己之不德不患人之不來何以驗之貞觀開元之盛來朝者多也

贊曰五方異氣所稟不同維南極海曰蠻與戎惡我則叛好我則通不可不德使其瞻風



舊唐書卷一百九十七

舊唐書卷一百九十七考證

林邑傳以十二月爲歲首○原本脫十字從新書添
東謝蠻傳冠烏熊皮冠○原本誤作烏熊皮履今改正
南詔蠻傳西復降尊傳蠻○原本脫降字從新書添

南陽靈壽縣西漢高祖廟是○東本似別字資諱書卷
東漢靈壽縣西漢高祖廟是○東本似別字資諱書卷
林邑書以十二月為歲首○東本似十字資諱書卷

舊唐書卷一百九十七考證

